CBETA電子佛典集成

CBETA Chinese Electronic Tripitaka Collection ebook

T09n0268

佛說廣博嚴淨不退轉輪經

宋智嚴譯

目次

- 編輯說明
- 章節目次
- 巻目次
 - · 001
 - · 002
 - 003
 - · 004
 - 005
 - 006
- 贊助資訊

編輯說明

- 本電子書以「CBETA 電子佛典集成 Version 2022. Q4」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta.org 回報。
- <u>版權所有</u>,歡迎自由流通,但禁止營利使用。

No. 268 [Nos. 266, 267] 佛說廣博嚴淨不退轉輪經卷第一

宋涼州沙門智嚴譯

如是我聞:

一時佛在舍衛國祇陀林中給孤獨園精舍,與大比丘眾千二百五十人 俱。爾時世尊於夜後分入無垢光三昧,文殊師利法王子於夜後分入 遍照三昧,彌勒菩薩摩訶薩於夜後分入遍炬三昧。爾時尊者舍利 弗,於夜後分明相出時,佛神力故從自房出詣文殊師利房。爾時尊 者舍利弗,欲入文殊師利房時,遙見佛精舍邊有十千蓮花迴旋圍 繞,聞大音樂歌頌之聲,彼諸蓮花出大光明,遍照祇洹及舍衛國, 乃至三千大千世界。

爾時尊者舍利弗,便不復見文殊師利房,而自見身在文殊師利前 立,見文殊師利結加趺坐而入三昧;即便彈指不能令寤,高聲謦咳 亦不能寤。爾時尊者舍利弗,見文殊師利如此神力,自見其身處大 海水,欲從其所,以神足力,乘虛還詣本所住房,而不能去。 爾時尊者舍利弗,即於文殊師利前結加趺坐,一心瞻仰目不暫眴。 時文殊師利與舍利弗東行,過一恒河沙世界到一佛士,其世界名說 不退轉音聲,佛號華光開敷編身如來,即見彼佛身諸毛孔皆出蓮 花,其花遍滿一萬由旬,皆出光明遍照三千大千世界,其華開敷有 百千葉,金剛為根,光網為莖,阿牟茶馬瑙為鬚,閻浮那提寶為 臺;其花臺上有菩薩坐,已於阿耨多羅三藐三菩提不退轉,得陀羅 尼具五神通逮得諸忍,以三十二相而自嚴身,身真金色。 爾時華光開敷遍身如來,臍中出一蓮花,光色嚴淨有百千葉,金剛 為根,青琉璃為莖,因陀羅網寶為鬚,優勒迦娑羅栴檀寶王為臺, 其花明淨塵垢不污,空無坐者。爾時文殊師利,往蓮花臺上結加趺 坐,即與花俱上昇虛空乃至有頂,還至佛所右遶三匝頭頂禮敬,還 坐花上一心合掌瞻仰世尊。爾時花光開敷遍身如來,知而故問文殊 師利:「從何所來?」文殊師利白花光開敷遍身如來言:「我從娑 婆世界來。」

爾時彼佛有二侍菩薩摩訶薩,一名美音,二名妙音,已於阿耨多羅三藐三菩提不退轉,從蓮華臺下整衣服右膝著地,一心合掌白佛言:「娑婆世界去此近遠?」爾時花光開敷遍身如來告二菩薩摩訶薩言:「善男子!娑婆世界今在西方,過恒河沙佛土,文殊師利從彼土來。」時二菩薩復白佛言:「娑婆世界現在說法佛名何等?」佛言:「彼佛名釋迦牟尼,今現在說法。」復白佛言:「彼佛世尊為說何法?」佛言:「釋迦牟尼佛說三乘法。」復白佛言:「云何

名三乘?」佛言:「三乘者所謂:聲聞乘、辟支佛乘、佛乘。」時 二菩薩白佛言:「諸佛說法皆不等耶?」佛言:「諸佛說法皆悉平 等。」時二菩薩白佛言:「云何平等?」佛言:「一切諸佛皆說廣 博嚴淨不退轉輪法,是故平等。」時二菩薩白佛言:「何故釋迦文 佛說三乘法?」佛言:「娑婆世界眾生,心樂小法不堪大乘,諸佛 如來以方便力說三乘法;釋迦文佛出五濁世,彼諸眾生不能堪受大 乘之法,以方便故分別說三。」時二菩薩白佛言:「釋迦文佛於娑 婆世界說法甚難。」佛言:「如是!如是!彼佛說法實為甚難。」 時二菩薩白佛言:「我等今者獲大善利不生彼國。」佛言:「善男 子!莫作是言,應速悔過。」時二菩薩白佛言:「世尊!我聞彼國 說法甚難,乃無一念樂生彼國。何故悔過?」佛言:「速捨此語, 應當悔過。所以者何?若於此十二十億百千那由他劫種諸善根,不 如彼佛世界,以一食頃說諸波羅蜜,教一眾生,受三自歸,奉持五 戒,遠離聲聞心,如是菩薩所行甚難;何況以出家正法發菩提心而 作饒益,如是菩薩倍為甚難功德無量。所以者何?娑婆世界多穢惡 故。」時二菩薩白佛言:「娑婆世界有何穢惡?」佛告美音、妙 音:「娑婆世界穢惡之事,以我神口盡汝壽量說不可盡。所以者 何?彼土眾生煩惱厚重,多行貪欲、瞋恚、愚癡,無量無邊諸不善 法,我以佛智乃能具知。 」 時二菩薩,即三讚歎:「善哉,善哉!釋迦牟尼!善哉,善哉!釋 迦師子!善哉,善哉!釋迦仙王! 「作是歎已,一心合掌懺悔: 「先來諸不善心,若離貪欲、瞋恚、愚癡,無量無邊諸不善法;若 曾發心求聲聞、辟支佛,今悉懺悔。」亦欲明淨求佛智心順解脫 心,為得佛智故,為一切眾生故,以無著善根相應心,持七寶花, 其花皆出百千光色,有百千葉,金剛為根,因陀羅寶網為鬚,優勒 迦娑羅栴檀寶王為臺,以一切諸寶王為莖,其花明淨塵垢不污,可 以眼識識,不可以手觸,猶如幻化果報,從三昧正觀生,於虛空中 遙散釋迦文佛上;所散之花,於虛空中變成花鬘、華雲、華蓋、寶 鬘、寶雲、寶蓋、繒鬘、繒雲、繒蓋,供養釋迦牟尼佛。復以百千 種色花鬘、末香、塗香、細末、栴檀,遙散釋迦牟尼佛上而以供 養。即於彼處五體投地,頂禮釋迦牟尼佛足,作如是言:「南無釋 **迦牟尼佛及娑婆世界諸菩薩摩訶薩,發大莊嚴成就大精進力諸先舊** 者,能持正法有大威力,能利益一切眾生而作照明,正求一乘,能 守護三世佛法城塹,不斷佛種住娑婆世界者。」作如是言:「我今 應往彼土見釋迦牟尼佛,并諸菩薩摩訶薩及餘眾生。」 爾時花光開敷遍身如來,聞二菩薩作如是言,又籌量觀察深心所 行,復以佛法誡勅安慰告言:「善男子!汝今欲往娑婆世界,見釋 迦牟尼佛,并諸菩薩及餘眾生者,當生尊重心、憐愍心、饒益心。

所以者何?彼諸菩薩,於甚深法不生怖畏,亦不誹謗,能奉三世諸佛教戒,以無著心種諸善根,不為果報勤行諸波羅蜜。此諸菩薩摩訶薩等,以本願故生彼佛土,為守護諸佛法城塹故,亦欲遍學一切佛法故。汝等今欲往彼見耶?」

時二菩薩白佛言:「世尊!若承佛神力及三世諸佛威勢護助,願欲 往見。」

爾時華光開敷遍身如來告,美音、妙音菩薩摩訶薩:「今欲往者,當與文殊師利法王子俱往。善男子當共汝往。」

爾時美音、妙音菩薩摩訶薩,語文殊師利法王子言:「我今因仁者力,欲往娑婆世界,見釋迦如來并諸菩薩及餘眾生。」

文殊師利言:「善男子!我今欲往十方世界,多供養恭敬尊重讚歎 禮拜諸佛,為令一切眾生入佛菩提得佛智故。」

時二菩薩語文殊師利言:「我今亦共仁者至十方世界,多供養恭敬尊重讚歎禮拜諸佛。如仁者為一切眾生入佛菩提得佛智故,我亦隨學。」

爾時文殊師利,頂禮花光開敷遍身如來,右遶三匝尊重恭敬,與彼菩薩并尊者舍利弗,受佛教已一心瞻仰漸漸却退,以如幻花而用散佛,以眾花鬘聚、塗香末香聚、諸幢幡蓋聚,皆是先佛威神之力,能生歡喜踊躍欣樂,以供養佛,以供養法,為令眾生得解脫故。供養佛已,猶如壯士屈伸臂頃,於彼佛前忽然不現,在東方恒河沙佛前自然而現,皆悉如上說廣博嚴淨不退轉輪法。

彼佛世界無有女人,亦無聲聞、辟支佛乘,世界莊嚴皆如蓮華開敷 遍身如來佛土,菩薩莊嚴充滿其國亦復如是。彼國諸佛臍中皆出一 大蓮花,文殊師利而坐其上,恭敬供養現諸神變皆亦如上。南、 西、北方、四維、上、下亦復如是,一一方面恒河沙諸佛如來,文 殊師利而現其前,彼諸世尊,皆說廣博嚴淨不退轉輪法。亦遣侍者 菩薩摩訶薩,此諸菩薩下蓮花臺,一心念佛合掌恭敬諮問彼佛:

「云何名三乘?」亦欲因文殊師利威神力往娑婆世界見釋迦牟尼佛 聽受法教。文殊師利皆悉安慰,十方世界諸菩薩摩訶薩:「我當共 汝至娑婆世界,見釋迦牟尼佛。」如是時間於此娑婆世界閻浮提中 夜猶未曉。

爾時尊者阿難從房門孔有光來入,即從床起出自房時,見有光明照祇陀林日猶未出,見祇陀林大水盈滿,其水澄清無諸擾濁,房舍園林悉皆不現便作是念:「今日必說未曾有法,故現斯瑞。」爾時尊者阿難,舉足入水不沒不濕,心生歡喜詣佛精舍,見一萬蓮花迴旋圍遶世尊精舍,聞大音樂歌頌之聲,彼諸蓮花出大光明,照祇陀林及舍衛國,乃至三千大千世界。佛威神故乃令阿難,心生歡喜,右膝著地一心合掌頂禮世尊,如是時間天已明了。

爾時佛精舍邊迴旋蓮華中有一蓮華,忽然而來至祇陀林處中而住。尊者阿難見是事已便作此念:「我今應往為佛世尊敷置法座。所以者何?今有此瑞必說大法。」爾時阿難為佛世尊敷置法座,當爾之時,大地六變震動,乃至十方恒沙世界皆亦震動——動、遍動、等遍動,起、遍起、等遍起,震、遍震、等遍震,搖、遍搖、等遍搖,踊、遍踊、等遍踊,吼、遍吼、等遍吼。是時天雨優鉢羅華、波頭摩花、拘物頭華、分陀利花,如是等花遍滿三千大千世界,華果諸樹自然而現。

時比丘僧欲出祇陀園門而不能出,見祇陀林大水盈滿,其水澄清無 諸擾濁,房舍園林悉皆不現,唯見大光遍照祇洹,集在房門而作是 言:「今現此瑞必說大法。」

爾時世尊從三昧安祥而起,出自精舍,昇所敷座。當爾之時,釋迦牟尼佛及十方佛放大光網,其光皆有百千種色照明正法,令諸眾生生歡喜故。爾時文殊師利,遊諸佛土皆與二菩薩俱,所經佛土皆悉禮拜供養諸佛尊重讚歎,為眾生故,為得佛智故,為攝眾生受教化故,現不可思議神變之事,隨其所樂而為說法。

時文殊師利法王子,知釋迦牟尼佛已昇法座,與諸菩薩摩訶薩,從地踊出住於佛前,與無量阿僧祇百千萬億那由他菩薩摩訶薩,遶釋迦牟尼佛滿百千匝,持百千萬種種色花。其花有不可思議百千萬葉,皆生歡喜踊躍欣樂以散佛上,所散諸花遍滿三千大千世界。復以優迦娑羅細末栴檀而散佛上,復以種種花香,其香亦有百千種色,常出戒香、忍香、精進香、禪香、慧香、智方便香、神通香、六波羅蜜香、無所著香、具諸道品方便之香,其栴檀香,能生歡喜踊躍欣樂,其香光明,皆是十方諸佛神力之所守護,為供養釋迦牟尼佛故,發大精進、勇猛精進、超勝精進、堅固精進、無等等精進,供養釋迦牟尼佛。

爾時文殊師利與諸菩薩摩訶薩,便莊嚴此土,化作八楞摩尼寶樹八觚分明;亦有種種寶樹莊嚴,寶蓋幢幡以摩尼寶網,及諸鈴網而嚴飾之;變此大地成摩尼寶,於其地上造諸堂閣,窓牖都欄妙寶牆壁;大小諸河,泉源花池,優鉢羅花、波頭摩花、芬陀利花、摩尼寶花,充滿其中;以甘露水,其水八味流注池中;有種種鳥遊集其上;作是變現為令眾生心歡喜故,為得佛智故,發大堪忍故,發菩薩心故,現如是等無量神變。是諸佛力,亦是文殊師利法王子力,亦是釋迦牟尼佛本願之力。爾時文殊師利及諸菩薩摩訶薩,作是神變已住於佛前。

爾時世尊放從法生光,遍照文殊師利及諸菩薩摩訶薩身。為令坐故,佛便微笑身出蓮華,其花有百千種色出,無量百千不可思議光,金剛為根,因陀羅寶為鬚,優勒迦娑羅栴檀寶王為臺,在虛空

中。諸菩薩摩訶薩,於其華上結加趺坐。釋迦牟尼佛,於自臍中放一光明,其光名曰照諸眾生最勝金剛王,即此光中有億那由他蓮花,其花亦出若干種色,其色寂靜無量無邊過於日光,清淨香潔遍照十方。其蓮花中自然變成微妙花帳,而是花帳諸佛所護,從法性生安隱寂靜,順解脫門空、無相、無作,不生不滅相應,踰過三世平等眼所見。文殊師利安坐花帳身相顯現,一心合掌正念觀佛,所謂佛能通達一切諸法,能生金剛三昧,於一切法無所得三昧。

爾時世尊,知文殊師利及十方諸佛所使菩薩摩訶薩,樂求法者專向一乘,已於先佛種諸善根,為文殊師利之所守護無怯弱心,勤修精進求佛菩提,如是等眾安隱坐已。爾時世尊告阿難:「汝往遍告祇陀林中諸比丘、比丘尼、優婆塞、優婆夷,使集聽法。」

時尊者阿難詣諸比丘房而告之言:「諸大德!世尊今勅汝等來集聽法。」諸比丘言:「大德阿難!我等先見此瑞,不能得往。」阿難言:「以何事故而不能往?」諸比丘言:「我等見祇陀林中大水盈滿,其水澄清無諸擾濁,大光遍照,房舍園林悉不復現,以是事故不能得往。」

時尊者阿難,還至佛所白佛言:「彼諸比丘不能得來。所以者何? 彼作是言:『我等見是祇陀林中大水盈滿,其水澄清無諸擾濁,大 光遍照,房舍園林悉不復現,以是事故不能得來。』」

佛告阿難:「彼諸比丘,於非水中而作水想,不但於非水中而作水想,亦於非色中而作色想,非受、想、行、識中作受、想、行、識想,非堅信作堅信想,非堅法作堅法想,非八人作八人想,非須陀洹果作須陀洹果想,非斯陀含果作斯陀含果想,非阿那含果作阿那含果想,非阿羅漢果作阿羅漢果想,非聲聞乘作聲聞乘想,非辟支佛乘作辟支佛乘想。阿難!汝往重告諸比丘、比丘尼、優婆塞、優婆夷來集聽法,此法皆是汝等昔所未聞。」

時尊者阿難,復往諸比丘所而告之言:「諸大德!世尊告勅汝等來 集聽法。」如是音聲遍舍衛國,諸比丘、比丘尼、優婆塞、優婆夷 普聞此聲。時尊者阿難,知四部眾聞此語已,還至佛所而白佛言: 「我以遍告四眾來集聽法。」

爾時世尊告大目揵連:「汝速往詣三千大千世界,遍告諸菩薩摩訶薩發大莊嚴者,及諸比丘、比丘尼、優婆塞、優婆夷,天、龍、夜叉、揵闥婆、阿修羅、迦樓羅、緊那羅、摩睺羅伽、人與非人,敬信佛法僧久種善根者,集祇陀林聽受正法;此法汝等昔所未聞,天人、阿修羅及餘世間所不能轉,唯於先佛所久種善根,樂求大乘、最勝乘、第一乘、無上乘、無等等乘菩薩摩訶薩,發大莊嚴勤行此法者能受能轉。」

時尊者大目揵連受佛教已,即於佛前忽然不現,猶如壯士屈伸臂頃,遍至三千大千世界,菩薩摩訶薩,比丘、比丘尼、優婆塞、優婆夷,天、龍、夜叉、揵闥婆、阿修羅、迦樓羅、緊那羅、摩睺羅伽、人與非人,敬佛、法、僧久種善根者,而告之言:「世尊告勅!汝等來集聽法。」爾時大目揵連,承佛威力及己神足,還至佛所白佛言:「諸聽法眾皆悉已集。」爾時四眾普來集會,縱廣一千由旬;在上諸天及餘眾生,住虛空中者,縱廣五千由旬。爾時文殊師利法王子白佛言:「世尊!今此四眾諸來集者,一心合掌頂禮如來,供養恭敬,世尊威德未敢就坐,唯願世尊,垂哀聽坐。」

爾時世尊,熙怡微笑,是時有無量閻浮那提金色蓮花,從地踊出,各百千葉,尸利迦寶為根,因陀羅尼寶為鬚,赤真珠為臺,七寶為莖,大如車輪;諸來會者,在於佛前皆坐其上。與文殊師利諸來菩薩摩訶薩,三十二相而自莊嚴身真金色,入於三昧身出光明。爾時文殊師利,及諸菩薩摩訶薩,諸來四眾,蓮花臺上曲躬恭敬,一心合掌瞻仰世尊。時文殊師利白佛言:「世尊!今此四眾虛空諸天皆已坐定,唯願如來等正覺,說廣博嚴淨不退轉輪法,今此會眾比丘、比丘尼、優婆塞、優婆夷、百千諸天,皆生須陀洹果想、斯陀含果想、阿那含果想、阿羅漢果想、聲聞乘想、辟支佛乘想。唯願世尊,為除此眾如是諸想,以何因緣,世尊說須陀洹果、斯陀含果、阿那含果、阿羅漢果、聲聞乘、辟支佛乘?」世尊默然。時尊者舍利弗白佛言:「世尊!我夜後分明相出時,從自房出詣文殊師利房,欲入房時遙見佛精舍邊,有十千蓮花迴旋圍遶,聞大音樂歌頌之聲,彼諸蓮花出大光明,照祇陀林及舍衛國,乃至三千大千世界,如是之相是何先瑞?」

佛告舍利弗:「此是文殊師利所請法瑞。」

爾時阿難白佛言:「世尊!我夜後分房門孔中有光來入,即從床起出自房時,見有光明照祇陀林猶如日出,見祇陀林大水盈滿,其水澄清無諸擾濁,房舍園林悉皆不現,如是之相是何先瑞?」

爾時世尊告阿難言:「此是文殊師利所請廣博嚴淨不退轉輪法瑞。」

爾時世尊即為阿難,而說偈言:

「佛乘無有上, 清淨無濁穢; 文殊無畏者, 今問如此事。 是乘無分別, 無漏無戲論; 文殊無畏者, 今問如此事。 此乘無所有, 畢竟無所生; 是處不可著, 文殊今已問。 是中終不說, 出生於諸果; 說此微密語。 諸佛導世者, 亦無來去相; 菩提無音聲, 文殊無畏者, 今問如此事。 其性不可得; 雖說諸音聲, 文殊所問法, 無音聲文字。 音聲猶如風, 無性無住處; 文殊所問法, 遠離諸音聲。 阿難今善聽, 文殊所問法; 諸佛微密語, 官說菩提空。 諸佛菩提法, 皆悉空寂相; 無有諸方所, 亦無有住處。 菩提如虚空, 無牛亦無滅; 亦無來去相, 唯佛能顯示。 猶如虚空中, 無有諸相貌; 文殊今問此, 妙淨菩提法。 去來今諸佛, 等說此菩提; 非是可見法, 亦無能見者。 如此法性相, 以音聲顯現; 二俱不相見。 法界與菩提, 淨檀波羅蜜, 尸羅亦復然; 能淨忍辱者, 顯現佛菩提。 能淨於精進, 禪定亦復然; 淨慧淨智者, 能顯見菩提。 能淨於方便, 到神通彼岸; 無依無猗者, 以聲說菩提。 我說三乘法, 諸果差別名; 隨其所樂聞, 分別而為說。 五濁世眾生, 其心多怯弱; 畏佛智慧故, 不趣佛菩提。 成就第四果, 名曰阿羅漢; 從聲得悟者, 是名為聲聞。 我說縛解相, 因緣各差別, 曉了此諸緣, 能現見諸法; 便名阿羅漢, 亦號辟支佛, 诵達無生法, 是名為菩薩。 空三昧無作, 無相無所有;

從此解脫門, 能入於涅槃。 於前中後際, 終不生染著; 已離於方所, 是故名無為。 阿難汝當知, 文殊問甚深; 能解微密語, 不分別諸果。 文殊住一乘, 不分別諸法; 諸果相所以? 以是故問佛, 三世皆平等, 空寂無性相; 不分別菩提。 遠離語音聲, 文殊所教化, 諸來大菩薩; 其數不減少。 二十恒河沙, 欲聞菩薩行; 今來詣我所, 亦欲聽三乘, 種種差別相。 文殊無畏者, 為除彼疑心; 是故今問我, 果相及乘相。 此是佛威神, 亦是本願力; 為拔苦眾生, 分別說三乘。 慇懃勸請我; 文殊無畏者, 唯願大法王, 說菩薩所行。 百千億諸天, 供養佛世尊; 皆著諸果相, 願除此疑心。 比丘等來集; 今此四部眾, 著諸果音聲, 不解微密語。 為除彼疑故, 文殊今問我; 以是眾因緣, 諸菩薩來集。」◎

廣博嚴淨經卷第一

宋涼州沙門智嚴譯

◎爾時阿難白佛言:「文殊師利法王子問佛世尊廣博嚴淨不退轉輪 法耶?」

佛言:「阿難!如是,如是!文殊師利法王子問我廣博嚴淨不退轉輪法。所以者何?諸佛世尊,皆轉廣博嚴淨不退轉輪法。」

阿難白佛言:「以何因緣,世尊說堅信、<mark>堅</mark>法、八人、須陀洹、斯 陀含、阿那含、阿羅漢、聲聞、辟支佛耶?世尊!彼之所行是菩薩 法耶?」

佛告阿難:「如是,如是!彼所行者是菩薩法。所以者何?五濁眾生心樂小法不求大乘,是故諸佛以方便力隨眾生性而為說法,以諸眾生多樂小法不堪大乘,如來以方便力觀其深心,令發道意入佛智慧。阿難!如來以如是方便度諸眾生到安隱處,無為無作離心數法,皆悉平等永滅苦樂,無有方所亦無住處,安隱寂靜無餘涅槃。」

爾時世尊說是語已而便默然。時尊者阿難問文殊師利言:「以何因緣故如來默然?」

文殊師利言:「尊者阿難!以諸眾生聞說是法少能信者,是故默然。世尊說微密之語,唯我能了,今四部眾咸生此疑:『以何緣故,世尊說堅信法乃至聲聞、辟支佛耶?』今此百千萬億那由他諸天,亦有百千萬億那由他諸菩薩摩訶薩,皆生疑心:『世尊何故說堅信、堅法乃至聲聞、辟支佛乘?』以佛默然而不說此難信法故,諸河泉源小大諸水湛然不流,空中諸鳥亭住不飛,日月不行,一切燈炬無復光照,一切眾生無有威光。所以者何?世尊默然而不解說難信法故。」

爾時世尊所住精舍,一萬蓮華迴旋圍遶者,皆發此言:「唯願世尊說廣博嚴淨不退轉輪法。所以者何?我等曾於此處聞九十二億百千那由他諸佛皆說此法。」

是時尊者舍利弗白佛言:「世尊!願說廣博嚴淨不退轉輪法。所以者何?我夜後分與文殊師利法王子,至東方恒河沙佛土,是諸如來皆說此法;南、西、北方、四維、上、下,無量無邊不可計數諸佛世尊皆宣此法。」

時虚空中有八十萬五千那由他諸天,白佛言:「世尊!願說廣博嚴淨不退轉輪法。所以者何?我等曾於此處,聞九十二億百千那由他諸佛皆說此法。」

爾時尊者阿難白佛言:「世尊!以何因緣說堅信、堅法乃至聲聞、辟支佛?今此四眾咸皆默然,乃至無有謦咳之聲,今此會中百千萬億眾生皆生疑惑:『世尊何故說堅信、堅法乃至聲聞、辟支佛乘?』唯願世尊,拔此大眾心中疑箭,此諸大眾是佛時證。」佛告阿難:「如是,如是!諸佛世尊所說之法皆有時證。」阿難白佛言:「誰是證耶?」

佛告阿難:「法是我證,諸佛如來以法為證而有所說。」

佛告阿難:「諦聽!諦聽!善思念之!吾當為汝分別解說,菩薩摩訶薩名曰堅信,乃至名曰辟支佛乘。」時尊者阿難,諸大聲聞,皆悉一心聽佛所說。

佛告阿難:「菩薩摩訶薩,令無量無邊阿僧祇眾生信佛知見,信佛 知見已,不著色不著受、想、行、識,以不著色不著受、想、行、 識故,是菩薩摩訶薩名為堅法。復次,阿難!菩薩摩訶薩,信諸佛 所說法皆悉空寂,信此法者,是菩薩摩訶薩名為堅信。復次,阿 難!菩薩摩訶薩,信於佛智,便作是念:『我等亦當成就此智,亦 不見此智。』是故阿難!菩薩摩訶薩名為堅信。復次,阿難!菩薩 摩訶薩,於五欲樂不生欣樂成就信力,是故菩薩摩訶薩名為堅信。 復次,阿難!菩薩摩訶薩作是念:『如佛世尊,以不可思議法施諸 眾生,我亦應學以不可思議法施諸眾生。』如是菩薩摩訶薩名為堅 信。復次,阿難!菩薩摩訶薩心生歡喜捨一切物,乃至自身尚以布 施,何況餘物,信行此施而不倚著,於一切處不生慳悋;以此因緣 迴向菩提,亦不起菩提見,是菩薩摩訶薩名為堅信。復次,阿難! 菩薩摩訶薩信心清淨無有怯弱,於佛、法、僧心得淳淨,守護六情 無所願求,無信眾生,於佛、法、僧令生信樂,已生信樂心不放 逸,發菩提心不著心相,信知六界與法界等。云何信知?所謂此界 以諸音聲文字故說,實不可得。信知諸行是無常、苦、空、無我之 法,亦信無漏聖戒非戲論法具諸三昧,信一切眾生即是滅界,眾生 之相即是滅相,以無依心見諸眾生即是法界,而於此法不見法界。 所以者何?法界即是眾生無心之界。菩薩摩訶薩如是信者名為堅 信。一切眾生無有住處。所以者何?自性空故。亦復不見眾生形 相,見諸眾生同涅槃相。所以者何?眾生界空,是故即見是涅槃 相。若有能信如是法者,令多眾生得如是信。是故阿難!菩薩摩訶 薩名為堅信。 」

爾時世尊欲重宣此義,而說偈言:

「能令諸眾生, 信向佛知見; 心不生染著, 是名為堅信。 信諸佛說法, 其性相皆空; 能信解此法, 是名為堅信。 信諸佛知見, 是不可思議; 發心而勤求, 我應得是智。 不生信樂心, 貪求五欲樂; 是信力成就, 是名為堅信。 信諸牟尼尊, 以法施眾生; 我亦應隨學, 是名為堅信。 信能行布施, 乃至捨自身; 是名為堅信。 亦不生施想, 不牛慳恪心; 信能施一切, 盡迴向菩提, 是名為堅信。 其心無穢濁; 信向於諸佛, 亦信無心法, 是名為堅信。 能守護六情, 亦不復願求; 已信解此法, 是名為堅信。 諸不信眾生, 以信而建立; 令隨順佛法, 是名為堅信。 以此信向心, 盡迴向菩提; 而不得心相, 是名為堅信。 知六界平等, 即與法界同; 以音聲分別, 不得諸界性。 苦空無有我; 信諸行無常, 成就是信力, 是名為堅信。 信無漏聖戒, 非是論戲法; 具戒三昧者, 是名為堅信。 信諸眾生界, 即是滅界性; 是名信中信。 能信如是相, 眾生無依性, 即是諸法界; 其性難思議。 如此諸法界, 若能如是信, 隨順彼法相; 此無畏菩薩, 是名為堅信。 信諸眾生身, 畢竟無所住; 其性本空無, 是故無處所。 眾生是涅槃, 其性即空故; 以是義顯示, 寂靜涅槃相。 若能如是信, 名無畏菩薩; 如是諸眾生, 皆名為堅信。 亦如是宣說; 阿難善受持,

若有如是信, 是名為堅信。 如是等諸法, 餘無量無邊; 佛為諸菩薩, 說是差別相。

「如是,阿難!如來、應、正等覺,以方便力為聲聞人說菩薩摩訶薩名為堅信。復次,阿難,今當為樂此法眾生,復以偈頌說菩薩摩訶薩名堅信義。」 爾時世尊,即說偈言:

「皆共和合一心聽, 我說佛子諸功德; 布施持戒及精進, 忍辱禪定智慧身。 不信者信佛淨智; 信向樂求如是法, 導化世間無厭倦。 有如是信名菩薩, 信解諸法無分別, 其性空寂佛所說; 若能善解如是法, 是名菩薩堅信者。 信佛知見無有量, 發心欲求如是智; 我當何時得此智。 無上大人所有智, 不信欲樂是淨法, 不為欲因行惡業; 以信力故樂求法, 有此勝信名菩薩。 信諸如來以法施, 我亦應當如是學; 佛所說法隨順行, 有此勝信名菩薩。 信能捨此上餚饍, 象馬金寶及奴婢; 男女眷屬所愛妻, 大小村城及國十。 亦以手足支節施, 破骨出髓無所畏; 耳鼻眼目及以頭, 有此勝信名菩薩。 信知此身內無主, 是故能以惠施他; 亦復能以妙法施, 以是因緣求佛智。 信能捨此無我身, 見來求者心歡喜; 如是眾生我善友, 為菩提捨危脆身。 信如是法菩提因, 以清淨心化世間; 聞法不疑佛知見, 有此勝信名菩薩。 知眼無常及耳鼻, 舌身及意亦復然; 知是虚偽不牢固, 為菩提因悉能捨。 見苦眾生無信手, 化令住信能信施; 皆令信佛最上智。 自住慈心愍世間, 見著六塵行惡者, 化令迴心趣佛智; 能信菩提無心相。 不得此心菩提因, 見諸眾生界無智, 不知六界是平等;

以音聲說不可得。 此法皆同法界相, 無常計常癡冥中; 見諸眾生在生死, 今信解空無有我。 教信諸行是無常, 教令信佛無上戒; 見諸眾生行惡戒, 自淨戒定諸功德, 有此勝信名菩薩。 見諸眾牛多懶墮, 教令信佛大精谁; 知精進力自調伏, 能持此信名菩薩。 教信陰身無有壽; 見愚眾生計壽命, 了知滅界同法界, 若知此法是勝信。 雖復異世業不亡; 分析此身無去住, 所造善惡諸業因, 終不遠離此法性。 此界亦同諸眾生; 見眾生性無依法, 法界平等不思議, 無畏菩薩如是信。 佛說此信無有二, 勤修善行知諸法; 亦為他說如是信, 而不染著於三有。 信如是等眾生性, 無有決定常住處; 空不可取無相法, 能信是法名菩薩。 是諸眾生如空定, 亦不寂靜涅槃界; 不可說有諸性相, 知是法者名持信。 見諸眾生信邊法, 以寂靜法而導之; 故於三界得高稱, 亦名持信勝菩薩。 若有如是妙勝信, 發無畏心樂求法; 廣向時眾而官說。 我法若有黠慧人, 已說堅信諸功德, 及餘種種差別相; 不著三界清淨心, 憐愍眾生良福田。 住清淨戒修忍辱; 長夜布施自調伏, 精進修定及智慧, 行菩薩行心調伏。 以諸相應方便智, 導眾牛到安隱處; 能令不墮諸惡趣, 有如是智名菩薩。 以真淨心動世界, 震起波踊有六種; 光照華上坐菩薩, 皆說寂靜空無法。 西方北方亦復然; 東方國十及南方, 上方下方及四維, 皆同說此寂靜法。 亦教他人信佛智; 寧捨身命不疑佛, 若諸眾生有是信, 佛及行者能證知。

 \bigcirc

◎「復次,阿難!云何如來說菩薩摩訶薩名為堅法?阿難當知!菩 薩摩訶薩,於佛正法終不退轉,受持佛法為他宣說終不毀犯,於不

可思議真如法界,應當逮得如是等法,堅心受持而無怯弱;能觀諸 法真實之相不生染著故,而於此法無所受持,於法非法亦不生著, 應如是持樂求諸法; 求已能受, 受已能持, 持已能說, 歡喜調柔易 可共住,常樂宣說寂靜之法,不動法界能逮諸法真實之相;於諸法 中善得調伏,亦不毀損常住妙身,如此之身常住故妙;應知此身無 始無終無聚無散,應如是知;如佛世尊,為諸菩薩分別解說,於此 法中亦應逮得,見一切法清淨無垢,善解諸法無可著處;諸法性虛 不可得見,以不見故無所受持;宣說法界無相無性,無有言說亦無 所有無有思想,遠離思想心不可得,其性寂靜離諸音聲,無有言說 非境界法;常樂受持宣說是法,而於是法心無所依,以如是等無所 有法,種種差別為菩薩摩訶薩說,而於此法不作合散無種種相,如 其所說皆已逮得,已得此法名為性地;性地菩薩摩訶薩,乃至於少 法中不生來去想,已能受持不來去法,而於此法不生增減亦無聚 散,若能受持不增不減不聚不散,如是等法是名堅法。菩薩摩訶薩 於諸法性得無所得,以於此法性無所得故,是菩薩摩訶薩名為堅 法。」

爾時世尊,欲重宣此義,而說偈言:

「於諸佛正法, 而無所退轉; 能持如是法, 是名為堅法。 不思議法界; 未曾有毀犯, 能逮如是法, 是名為堅法。 久發心受持, 諸佛所說法; 心無有怯弱, 是名為堅法。 於一切法性, 正趣而勤求; 不牛染著心, 是名為堅法。 不著亦不住, 亦能教示他; 能持如是法, 是名為堅法。 調柔易共住, 官說寂靜法; 不動彼法性, 是名為持法。 了知諸法體, 而無有性相; 於此法決定, 是名為持法。 亦未曾毀損, 常住真妙身; 當知此身者, 即以法為體。 此身無終始, 諸法之所成; 於此無增減, 是名為持法。 佛為諸菩薩, 官說諸法相; 能得如是法, 是名為持法。

此界性自空, 於法無染著; 能持如是法, 是名為持法。 觀察一切法, 性空不可見; 亦復無所持。 以不見法故, 以無所持故, 能顯示法界; 無性相音聲, 其體無所有。 遠離諸思想, 心亦不可得; 以不得心故, 名不可思議。 已遠離心想, 宣示寂靜法; 名不可思議。 無音聲境界, 亦復無所信; 能持如是法, 不依無所信, 不依無所有。 佛為諸菩薩, 官說如是法; 不合亦不散, 亦無種種相。 若說於此行, 得住於性地; 已住於性地, 即名性地人。 住性地菩薩, 畢竟無所依; 能持如是法, 是名為持法。 以是故阿難! 菩薩摩訶薩, 於法無所得, 即名為持法。 若有諸眾生, 佛道牛猿想; 以方便力故, 今到究竟處。 如是法及餘, 為諸菩薩說; 以微妙方便, 顯示佛知見。 持法大明人, 唯佛能證知; 無畏諸菩薩。 及修行此法, 不可思議智, 說持法差別; 法非法清淨, 安住是法中。

「如是,阿難!如來正等覺,以方便力故為聲聞人,說菩薩摩訶薩 名為堅法。

「復次,阿難!云何如來說菩薩摩訶薩名為八人?阿難當知!菩薩摩訶薩,已過八邪修八解脫不著八正,過凡夫法而無所作,逮平等道過凡夫法,勤求菩提不得菩提;離諸邪見而修正見逮平等道;離自身相,雖未得佛身而求菩提;離眾生想,而修佛想逮平等想;離眾生摷窟法求無摷窟法,於諸法中而無所住。所以者何?不見有法而可住者;過世間法開通聖法已逮滅界,亦不得世間及出世間法,遠離有無是法非法,善能觀察斷常二邊;觀去來現在心相,乃至菩

提心相亦不可得。所以者何?已逮眾生心相平等法故;是以毒不能 害火不能燒刀不傷身。所以者何?已能遠離諸境界故。雖未得佛 行,已於諸趣無有決定。所以者何?菩提離諸趣故。菩提趣者安靜 無為,菩提性空無有處所,是以刀不傷身名不可害,其乘速疾名不 可害。所以者何?速達此乘無有罣礙,以是事故刀不傷身。亦有遍 緣眾生慈菩提行慈,一切眾生界不可得,無所行慈一切法空慈,趣 寂靜界慈,離瞋恚慈,行智明慈,能照菩提,眾生界不可得慈,竭 緣眾生故刀不能傷,知欲、色、無色界皆悉平等,亦知法界平等 緣眾生故刀不能傷,知欲、色、無色界皆悉平等,亦知法界平等 聲,菩薩摩訶薩能了知是界,於諸趣中所有言說音聲皆能了知。所 以者何?以於無來去法界中得無住法忍故。善知一切眾生言音,所 為解說寂滅之法,不作是念:『我於是時為此眾生說法。』已遠離 我想諸音聲故,知諸法寂靜故,於諸法中不取其相,不可得故,不 著言說故,是菩薩摩訶薩名為八人。」 爾時世尊,欲重宣此義,而說偈言:

「已過於八難, 正住八解脫; 不著八正見, 是名為八人。 已禍凡夫法, 而不住正道; 處中離二邊, 是名為八人。 已過凡夫法, 而離求菩提; 不得菩提相, 是名為八人。 遠離諸邪見, 能修行正見; 逮得平等道, 是名為八人。 猿離自身相, 而不住菩提; 雖未得佛身, 是名為八人。 除去眾生想, 能修行佛想; 已逮平等相, 是名為八人。 離眾牛摷窟, 求無摷窟法; 不住於諸法, 是名為八人。 已禍世間法, 而開捅聖法; 成就於滅界, 是名為八人。 諸佛所說法, 及餘世間法; 不得此法相, 是名為八人。 見有是一邊, 見無第二邊; 是名為八人。 能捨如是見, 觀察中道法, 及與斷常邊; 知是平等想, 是名為八人。

不得過去心, 及與未來心; 是名為八人。 現在心不住, 能生菩提者; 所說最初心, 此心不可得, 云何得菩提? 不得菩提心; 若能逮得此, 故毒火不能, 傷害壞其身。 其趣雖不定, 遍修如是行; 埭無去來法, 故名不可害。 菩提無趣相, 以音聲故說; 故名不可害。 善解音聲相, 來相亦復爾; 去相不可得, 音聲說去來, 故名竦疾乘。 是故名安隱, 亦名為空無; 亦名速疾乘, 亦名不可害。 如是速疾乘, 菩薩應通達; 無能罣礙者, 是故名不害。 設以利刃刀, 不能傷其身; 不見於身相, 故刀不能害。 遍緣眾生慈, 及以菩提慈; 行菩提慈故, 不為刀所害。 無行無眾生, 不得眾生界; 遍緣眾生慈。 寂靜無生慈, 遠離瞋恚慈, 及行智明慈; 能照菩提慈, 遍緣諸眾生。 解刀是空法, 善修於身相; 未得菩提道, 不為刀所害。 已逮寂靜界, 遠離諸惡趣; 惡業不能障, 不為刀所害。 遠離於無明, 已證知明法; 逮得菩提照, 是名為八人。 能知欲色界, 無色界是空; 皆悉是平等, 是名為八人。 界與菩提等, 無有種種相; 無智無分別, 清淨無戲論。 菩薩無所依; 已逮此平等, 所說諸音聲, 能遍至諸趣。 來去諸音聲, 皆歸於法界; 得此最上忍。 於無住法中,

善解眾生音, 為說寂滅法; 不生如是心, 我為彼說法。 已禍音磬法, 不取種種相; 知諸法寂滅, 是名為八人。 已過諸音聲, 诵達音聲界; 不著音聲者, 故名為八人。 是名為八人; 阿難!以是事, 雖作如是說, 其實不可得。

「如是,阿難!如來等正覺,以方便力為聲聞人,說菩薩摩訶薩名 為八人。

「復次,阿難!云何如來說菩薩摩訶薩名須陀洹?阿難當知!不可 思議佛道名須陀洹。菩薩摩訶薩住無所住近於佛道,不受諸法,無 所依倚亦無所緣;不住諸法畢竟無生。菩薩摩訶薩為得是道故,堅 固精進、堅固思惟無有懈怠;終不違逆心無所依,諸佛所乘無上最 勝出要之道,不著此道亦不住中,以如是道推求諸法;雖復推求而 無所得,而於彼道不動不住;於道想、生死想、佛想能生平等,於 結障法平等、諸法平等、諸佛平等,遠離身見能生佛見開悟諸見, 修對治想已過我想。阿難!以是事故,菩薩摩訶薩名須陀洹。不著 佛道逮無染道,不疑佛菩提,不選擇戒,乃至不見佛戒;以不見 故,不選擇戒不分別戒,永斷三結不住三界,已逮佛道離眾生想, 無所依止離依止法,專求佛道得安隱寂靜道。不惜身命,以歡喜心 能捨一切物,顏貌和悅無有嚬蹙;為菩提故而行布施,無有少物而 不能捨;為濟苦眾生故,令到涅槃故,為修有相法故,得無相法 故,離眾生想入眾無畏,說寂靜法淨菩提道;無所怖畏乃至無有死 畏。所以者何?以逮得寂靜法,遠離塵垢安住佛道,善修惡趣諸平 等想無戲論道。阿難!以是事故,菩薩摩訶薩名須陀洹。」 爾時世尊,欲重盲此義,而說偈言:

「不思議佛道, 名為須陀洹; 若有住此道, 必流入菩提。 此道如虚空, 不依一切法; 無緣無所住, 所有不可得。 能逮如是法; 菩薩堅精進, 諸佛導世者, 無上出要道。 不染著此道, 亦復不住中; 以此道推求, 不見一切法。 此道無動搖, 亦復無住中;

不懈怠如佛, 不逆無所畏。 所說牛死相, 佛想亦復然; 能於此平等, 知是須陀洹。 諸結及與障, 能覆佛道者; 皆悉能遠離, 是名須陀洹。 能斷於身見, 而生於佛見; 開悟諸邪見, 善修對治想。 善修自身想, 知我想過患; 不著於佛道。 是名須陀洹, 我不得菩提; 設生此猶豫, 即得無染著, 而求於佛道。 亦不選擇戒, 不願佛尸羅; 已斷於戒想, 不分別尸羅。 永斷於三結, 不住於三界; 已逮得佛道, 善修眾生想。 以無所緣道, 而求於菩提; 佛無垢菩提。 已逮寂靜道, 好樂行布施, 和顏無嚬蹙; 不惜於身命, 為無戲論道。 為苦惱眾生, 一切皆能捨; 妙勝果之上。 令過須陀洹, 遠離諸有想, 善通達無相; 以是故無有, 惡名諸怖畏。 所說法非法, 二俱能遠離; 於中不染著, 無有惡名畏。 其心無所畏; 若入大眾時, 官說寂滅法, 已淨菩提道。 若起眾生想, 能牛其直實; 以是故無垢, 猿離一切畏。 乃至無所畏; 已離一切怖, 已得寂靜道, 安隱無有上。 知惡趣平等, 而不生怖畏; 此道現在前, 無有吾我想。 菩薩如是法, 名為須陀洹; 為樂小法者, 而作如是說。 以微妙方便, 宣說於佛法; 於道放逸者, 令入如是法。 捨方便而說; 諸佛之導師,

為諸久行人, 求最勝道者。 以是故阿難! 我說須陀洹。 點慧諸眾生, 能解了是事 以是故阿難! 我說須陀洹。 我說須陀洹, 認分別是事語 不點慧眾生, 認分別是事語。 不解微密義。 不解微妙義, 不解微妙道。 , 不解微妙道。 , 不解微妙道。 , 以須陀洹名, 顯示諸佛法。

「如是,阿難!如來等正覺,以方便力為聲聞人,說菩薩摩訶薩名 須陀洹。◎ 廣博嚴淨經卷第二

◎「復次,阿難!云何如來說菩薩摩訶薩名斯陀含?阿難當知!菩 薩摩訶薩,隨學佛智解了菩提不從緣生,為無緣智故而求佛智;以 眾因緣求無處所禪,而求佛智得燒煩惱法,燒諸煩惱得佛平等法, 求未得法如諸佛、阿羅訶、三藐三佛陀;雖度眾生而不動眾生求、 不動眾生界。有諸眾生慧心微薄,愁憂苦惱不解法界,欲令此眾住 於智故而求佛智,於根、力、覺、道、解脫三昧,先自覺悟覺悟眾 生,而求佛智所可用智能至道場。為得此智,而求佛智佛眼,是不 可思議無障礙眼,恒以此眼利益世間。為求是智眼故,求智中勝智 所可用智,知一切法如如亦不可得,此智所可用智,令一切眾生住 是智中,所謂不住一切法智,以是事故而來此間。來已見眾生界, 是不可思議界,求是界已不得此界,眾生從何而生?不知眾生生 處。從眾生界有差別名,觀察法界眾生界時,不見是差別相,見眾 生界盡入法界,見法界是平等道、佛法道,是眾生不可得道、眾生 平等智道。為求是無比智故,此智清淨離塵垢,不得此智不可以此 智求,知此智是無所知智。菩薩摩訶薩以此智故而有差別,未得此 智,為求此智而來此間。阿難!以是事故,菩薩摩訶薩名斯陀 含。」

爾時世尊,欲重宣此義,而說偈言:

以求佛智故, 是名斯陀含。 所說眾因緣, 能生於菩提; 為如是緣故, 是故來此間。 所說無處禪, 能燒諸煩惱; 以是故來此, 為牛此禪故。 先所未得法, 一切智所行; 我亦欲求故, 而來於此間。 不動諸眾生, 法界亦如是; 為不移動故, 是故來此間。 愁憂諸眾生; 苦惱無點慧, 欲令如是眾, 住佛無量智。 諸根力覺道, 解脫及與禪; 自覺覺他故, 而求於佛智。 先佛所行法; 能趣向道場,

為求此法故, 是故來此間。 為求如是智, 不思議佛眼; 求如是眼故, 而來於此間。 所行巧方便; 諸佛導世師, 為求如是智, 諸智中最勝。 諸所可用智, 能知諸法如; 此智不可得, 云何求諸法? 願令多眾生, 安住無上智; 亦欲令他知, 故來於此間。 來已見眾生, 其界不思議; 是以斯陀含, 來此求眾生。 以求眾牛界, 眾牛不可得; 是故雖來求, 亦復不可知。 不知諸眾生, 及以眾牛界; 若能知此界, 知眾生差別。 觀察一切法, 觀已無所見; 安住於定心, 而求諸佛法。 若有此淨智, 無垢性清淨; 亦不得此智, 而知於所知。 以如是眾生, 能逮得此智; 名無依菩薩, 是故來此間。 阿難!以是事, 名為斯陀含; 無點慧眾生, 謬分別是事。 阿難!以是事, 名為斯陀含; 勤精推眾生, 乃能知是事。 慧者解微密, 於深法決定; 能解如是義, 揀能牛菩提。

「如是阿難!如來等正覺,以方便力為聲聞人,說菩薩摩訶薩名斯陀含。

「復次,阿難!云何如來說菩薩摩訶薩名阿那含?阿難當知!菩薩摩訶薩,已過分行得佛所行,遠離一切諸所行法,知無來去法,於諸法中無所依無所住,是故不來此間。所以者何?亦不見法來去相故。已過凡夫離凡夫想,亦離佛想過無所住法,無有因緣能使來者。所以者何?已逮寂靜界故。諸佛導世者,說凡夫禪不往生,彼離諸難處永斷愛欲,不貪摶食永離食想,逮得菩提示諸邪見無所貪著。知六十二見性同涅槃離諸蓋想,離諸法中所有過患清淨無垢,制伏憍慢拔無明箭。已害愛結無復喜愛,燒諸煩惱離一切想,拔憂

惱箭離慢大慢,善知諸音逮得照明,乘不可思議佛乘,得菩薩摩訶薩性。離欲污泥得先佛所藏,最勝智藏無增無減,得一切眾生乘中最上佛乘。離有無想斷一切疑,菩薩摩訶薩成就如是等法,不來此間名阿那含。復次,阿難!菩薩摩訶薩有緣眾生令住菩提。云何而住?所謂眾生即是菩提,菩提即是眾生,能覺眾生想。所以者何?已了知性空故。知眾生界是不可思議界故,是故能覺此想,能知眾生界即是虛空界,虛空界空故遠離眾生界,虛空界離虛空性無所止住,虛空界虛空性空,以如是法令諸眾生迴向菩提。所以者何?知眾生是虛空界。眾生界皆入虛空界。所以者何?眾生性諸法性各各相入。所以者何?以不可得故。以不可得故不來此間,是故數名阿那含。一切諸法中無有數相,諸佛已過數相。阿難!以是事故,菩薩摩訶薩名阿那含。」

爾時世尊,欲重宣此義,而說偈言:

```
「已離不復來, 更不修分行;
已離分行故,
        是名阿那含。
善知來去相,
        不依一切法;
不得少處所,
        而可來此間。
        所說凡夫禪;
諸佛導世師,
更不往彼間,
        是名阿那含。
諸法無來相,
        去相不可得;
        是名阿那含。
埭無來去相,
其人更不復,
        趣向三惡道;
已逮諸佛法,
        是名阿那含。
永斷一切欲,
        不會於摶食;
已逮菩提道,
        是名阿那含。
所說諸見處,
        凡有六十二;
更不住見處,
        故名阿那含。
        已離於性相;
諸法無性相,
如實了知故,
        更不來此間。
說涅槃寂靜,
        能燒諸煩惱;
        故不來此間。
能遠離諸相,
已斷諸難處,
        能遠離塵垢;
到安隱涅槃,
        是名阿那含。
已降伏惡魔,
        及其諸眷屬;
不為彼所動,
        是名阿那含。
已拔無明箭,
        亦害諸愛結;
已覺知喜愛,
        是名阿那含。
```

能燒諸煩惱, 亦離諸有想; 決定勝妙果, 是名阿那含。 已拔憂惱箭, 除去諸憍慢; 善知五陰相, 是名阿那含。 已逮諸照明, 不思議佛乘; 遠離欲污泥, 是名阿那含。 已得大智藏, 先佛之所藏; 是名阿那含。 諸藏中最勝, 已安住無上, 諸佛之大乘; 永斷諸疑心, 是名阿那含。 有緣諸眾生, 皆今住菩提; 而不來此間。 眾牛界難思; 能知諸空界, 已離如是想, 是名阿那含。 能知眾生界, 及以法界空; 是名阿那含。 不得諸眾生, 其心更不求, 取著諸有相; 已到無相處, 是名阿那含。 阿難!以是事, 是名阿那含; 以無所住法, 而住佛法中。

「是故阿難!如來等正覺,以方便力為聲聞人,說菩薩摩訶薩名阿 那含。

「復次,阿難!云何如來說菩薩摩訶薩名阿羅漢?阿難當知!菩薩摩訶薩,離諸分行應行佛行,拔濟一切眾生行破諸煩惱,應為煩惱所苦眾生解煩惱縛,而不得眾生亦不得煩惱縛,應作是事名阿羅漢。捨有所得住無所得,知一切空,此空亦空,通達無相,以離諸相離一切想,知眾生想是過患法,能捨無智達無心法,曉了空法應逮菩提,應生不可思議佛菩提,以是事故名阿羅漢。應宣說法,如三世佛已說今說當說,其所說法皆悉寂靜,無有戲論清淨無穢,通達是事故名阿羅漢。應令眾生住於菩提,知一切法及與菩提是無所有而不可取,應修佛慈不著眾生慈,以如是慈遍緣眾生,而不得眾生,已逮眾生不可得慈,故名阿羅漢。應說諸法利益眾生,而不起法非法想,於諸法中,應常在先,是名阿羅漢。應為眾生說根、力、覺、道,而於此法不染不著,故名阿羅漢。應令眾生知清淨菩提,令彼眾生起如是菩提,故名阿羅漢。應於世間眾生利養而不負著,應為眾生說不貪著利養法,說此法故名阿羅漢。應往諸佛世界,應見諸佛如佛見佛,見如是佛世界已,應當發心求如是世界,

所謂不可思議世界,不可量世界,無等等世界,無邊世界,無戲論 世界,不可說世界,空世界,無相世界,無作世界,不退轉世界, 離女人世界,離婬欲世界,無煩惱世界,佛無礙辯世界,菩薩世 界,無障礙世界,無染世界,降魔世界,無怨敵世界,無畢竟涅槃 世界,此諸世界,於一切世界中上,應求如是世界,故名阿羅漢。 未生諸法應生起,故名阿羅漢。於欲不染於可瞋法不生瞋,故名阿 羅漢。於無上滅集智速通達故,名阿羅漢。以阿羅漢故名為菩提, 以菩提故名阿羅漢。菩提不動,以眾生界不動故,應今百千萬億眾 生住菩提道,住菩提道故名阿羅漢。一切眾生及與菩提,從無分別 生,應以是平等法教諸眾生,此平等法,於一切法中無與等者,此 平等菩提從無分別生,應知如是法,知是法已,為眾生說無有增 減,成就無增減法故名阿羅漢。應說如是離音聲法,故名阿羅漢。 應解如是多眾生著,所謂眾生不可得著,眾生斷常著,眾生身見 著,不能過著,見諸法不生不滅無為無作著,不壞色著,不壞受、 想、識、行著,離凡夫法著,建立諸佛法著,須陀洹果想著,斯陀 含果想著,阿那含果想著,阿羅漢果想著,辟支佛果想著,如來等 正覺想著,菩提心想著,為菩提故行施著,為菩提故護戒著,取瞋 **患想行忍著,取懈怠想行精進著,取亂心想生禪定著,取惡慧想修** 智慧著,於父母妻子男女眷屬兄弟姊妹所愛諸親著,欲見愛念諸親 著, 樂談說著, 煩惱法出要法作二見著, 貪利養著, 見在家出家 著,見卑勝法著,離凡夫法著,緣佛法著,見下上法著,具足諸相 方便著,生佛世界想著,應除眾生如是著故名阿羅漢。亦不分別是 眾牛是涅槃法、是眾牛非涅槃法,是眾牛能牛法、是眾牛不能牛 法,是眾生行菩提、是眾生不能行菩提,是眾生持戒、是眾生毀 戒,是眾生多福、是眾生少福,不起如是二見名阿羅漢。亦不分別 是眾生是福田、是眾生非福田,是眾生精進、是眾生不精進,是眾 生凡小、是眾生智明,此是女人、此是男子、此是非男非女,此是 法、此是非法,不起如是二見名阿羅漢。亦不分別是眾生於菩提退 轉、是眾生於菩提不退轉,是眾生於菩提得自在、是眾生於菩提不 得自在,是眾生近菩提、是眾生遠菩提,發如此心,我當得菩提入 無餘涅槃,略說能除眾生一切著故名阿羅漢。阿難!阿羅漢如是除 眾生著已,亦為眾生說眾生實性,說如是法故,菩薩摩訶薩名阿羅 漢。」

爾時世尊,欲重宣此義,而說偈言:

「已能捨一切, 所有諸分行; 能捨分行故, 是名阿羅漢。 能斷諸煩惱, 及苦眾生結;

皆令得解脫, 是名阿羅漢。 住無所得法; 遠離有所得, 知一切法空, 是名阿羅漢。 已能知解空, 亦通達無相; 遠離一切相, 是名阿羅漢。 應行最勝行, 諸佛之所行; 生死大險難。 度脫諸眾生, 知眾生想過; 已離一切相, 是名阿羅漢。 能捨諸想故, 捨諸無知想, 涌達無心法; 已知空法故, 是名阿羅漢。 應遠得諸佛, 不思議菩提; 是名阿羅漢。 應勤行精進, 應宣說諸法, 清淨無戲論; 令眾生住道, 是名阿羅漢。 令眾生安樂; 應以遍緣慈, 而不得眾生, 是名阿羅漢。 於眾最第一; 應官說諸法, 無法非法想, 是名阿羅漢。 應為諸眾生, 說根力覺道; 不染著此法, 是名阿羅漢。 應令他眾生, 覺了清淨法; 亦能生菩提, 是名阿羅漢。 世所有利養; 應不生貪著, 不貪利養故, 是名阿羅漢。 應往詣諸佛, 嚴淨妙世界; 為眾生說法。 諸佛所住處, 應當發是心, 求此嚴淨界; 應求是界故, 是名阿羅漢。 於欲無所染, 瞋處不生瞋; 知菩提平等, 是名阿羅漢。 已於滅集智, 涌達寂滅相; 以菩提道故, 是名阿羅漢。 於諸眾生界, 不移動眾生; 令多億眾生, 皆住菩提道。 從無分別生; 眾生及菩提, 能知此平等, 是名阿羅漢。 一切法等中, 此法等最上;

此等及菩提, 從無分別生。 知已為他說, 而無有增減; 亦從此法生, 故名阿羅漢。 應為此眾生, 說無音聲法; 解脫多眾生, 而無有動者。 眾生不可得, 及斷常二邊; 令得脫眾苦。 為除諸邪見, 著諸法牛滅, 無為無作相; 諸苦惱眾生, 以相而分別。 不毀壞於色, 於受亦復然; 想行及與識, 令離此諸著。 於此凡夫法, 而見有移動; 住佛法不住, 皆令得解脫。 住於諸果想, 緣覺想亦然; 為眾生說法, 令離佛想著。 著於菩提心, 著施亦復然; 著於戒忍者, 為說無著法。 取於懈怠想, 分別行精進; 定心與亂想, 惡慧及妙慧。 不分别此法, 知無種種相; 應當如是說, 是名阿羅漢。 堅著於我想, 聲聞多分別; 為除分別故, 應為彼說法。 父母及妻子, 無慧故貪著; 是生死所行。 此道非菩提, 此是我兄弟, 姊妹愛念心; 除彼貪愛著, 是名阿羅漢。 故作巧談說, 發他喜勇心; 生意欲得見, 先舊諸所親。 若得相見時, 展轉牛愛著; 無智顛倒故, 屬魔不自在。 遠離諸利養, 知利養禍患; 應為諸眾生, 說諸利養過。 此是煩惱法, 此是出要法; 不著此二見, 是名阿羅漢。 貪著於利養, 而不能自解; 能除彼著故, 是名阿羅漢。 此是出家法; 此是在家法,

凡小起分别, 應為解彼著。 於一切法中, 而見有卑勝; 著是器非器, 應解如是著。 而緣於佛法; 遠離凡夫法, 應為彼說法, 離得不得著。 如是甚眾多; 大小非堅法, 當應為解著, 眾生如是相。 能生諸相好, 其事亦眾多; 唯有調柔者, 能除彼想著。 諸佛妙世界, 興起修淨心; 著彼世界想, 應當為除却。 涅槃非涅槃, 能牛不能牛; 此行菩提道, 此不求菩提; 惡戒及善戒, 有福及無福; 愚智諸眾生, 而作種種相。 如是諸眾生, 多有種種想; 為除此想故, 應為彼說法。 此是良福田, 此非良福田; 分別愚智法, 其事亦眾多。 取著於女想, 亦復分別男; 是聖是非聖, 分別起二見。 眾生無慧心, 起於此二見; 著此二見者, 應當為除斷。 退轉不退轉, 有記及無記; 此折於菩提, 此不折菩提。 已殔於菩提, 畢竟般涅槃; 行如是諸相, 分別於涅槃。 唯有調柔者, 除眾生是想; 是名阿羅漢, 亦名除想者。 此是菩薩法, 說名阿羅漢; 若見此本緣, 知是阿羅漢。

「如是阿難!如來等正覺,以方便力為聲聞人,說菩薩摩訶薩名阿羅漢。

「復次,阿難!云何如來說菩薩摩訶薩名為聲聞?阿難當知!菩薩 摩訶薩以佛法聲、不可思議法聲、寂靜菩提法聲、無戲論法聲、無 垢清淨法聲,令無量無邊不可計眾生聞故,名為聲聞。復以涅槃是 無比法安樂法聲,念處、正勤、神足、根、力、覺、道法聲,令多

眾生速能勤求,名為聲聞。說此身空非堅固法,堅固不可得,凡夫 愚小貪著此身,為解說聲;又說眼入所見虛妄,應生佛眼不可思議 法眼,以此眼故令多眾生無愚惑聲;又說諸法無生相聲,名為聲 聞。又說音聲其喻如響,不應於聲而生染著,無有聞者亦無說者, 於香不生嗅想,無有嗅香者,如人夢中嗅眾多香,實無有香亦無嗅 者,以顛倒故起嗅香想,此香猶如夢法,而不可信亦無牢固,說是 法聲名為聲聞。復說舌入猶如肉段,不能知味,如此肉段,猶如聚 沫實無所有,如是味想不可思議,味界無心,離諸心法不應生心, 知心是不住相,說如是法聲令眾生聞,名為聲聞。又於此法了了現 見,如其所見能宣說聲,又說是身空無性相,以無相故不生亦無所 生,為多眾生說是菩提法聲,名為聲聞。復說意入空無所有亦無自 性,其猶如幻不生不滅,說是法聲名為聲聞。又說不可思議法施, 此法能得菩提,菩提不可思議,法施亦不可思議,能生不可思議菩 提法。所以者何?如其種子果實亦然,此中無果,以音聲故說果。 復說財施下劣法施最勝,除却慳心,無所分別不生施想,猶如幻師 於所幻事無所分別,如是以無所分別心,而行布施能生菩提,說是 法聲名為聲聞。此聲離一切說息諸煩惱,過諸言說離諸染著,以是 音聲為諸眾生宣說佛法。所以者何?此音聲一切音中最上。以是音 聲宣說佛法,此聲不可破壞亦無所依,從無二無別生,如其所生說 無二無別佛法。是故阿難!菩薩摩訶薩,以如是法聲令眾生聞,名 為聲聞。」

爾時世尊,欲重宣此義,而說偈言:

「以不可思議,」最上佛法聲; 今多眾牛閏, 菩薩名聲聞。 能為多眾生, 說菩提寂滅; 清淨無戲論, 是名為聲聞。 其樂無有比; 官說涅槃樂, 亦說寂滅相, 是名為聲聞。 說念處正勤, 根力及覺道; 是名為聲聞。 速生此法故, 官說此身空, 牢固不可得; 顯說是身相。 為諸凡小者, 所見皆虚妄; 又說於眼入, 無智諸眾生, 於此生染惑。 應生於佛眼, 難思平等眼; 於無生法中, 亦不生惑著。 知聲猶如響, 解耳亦復然;

此中無閏者, 亦復無說者。 以無聞說故, 不應生染著; 宣示諸眾生, 是名為聲聞。 如人於夢中, 嗅種種諸香; 但依顛倒起, 而實無所有。 應如是知鼻, 不能嗅彼香; 為顛倒眾生, 菩薩宣說是。 說舌是空無, 肉段不知味; 若肉能知味, 手觸時應知。 官說如是想, 味想多渦患; 當知此味界, 是不可思議。 菩薩無所依, 能現見了了; 宣說現見法, 是名為聲聞。 空無有性相; 盲說如是身, 空無性相故, 不牛無所生。 菩提亦如是, 不生無所生; 為多眾生說, 故名為聲聞。 其實無所有; 說意入性相, 說無所有法, 故名為聲聞。 宣說布施法, 法施難思議; 此施能出生, 無上佛菩提。 財施是下劣, 法施為最勝; 能除慳貪心, 得至菩提果。 離諸官說聲, 息諸煩惱聲; 無垢清淨聲。 離諸染著聲, 最上微妙聲, 其聲性寂靜; 說難思佛法。 以此寂靜聲, 此聲不可壞, 亦復無所依; 說無二無別, 故名為聲聞。 以如是音聲, 宣諸佛所說; 隨音聲而說, 而求菩提道。 常為他官說, 嚴淨佛世界; 諸佛所住處。 無上道世師, 說此三千界, 如虚空而住; 如空諸眾生, 皆同涅槃相。 所說四十四, 令眾牛差別; 皆悉如虚空, 不思無分別。 此界亦如是, 莫牛堅固想;

此中無生死, 無煩惱可滅。 生中無法生, 亦無有眾生; 此皆寂靜故, 無有見牛者。 恒為眾生說, 書夜不斷絕; 而不生是念, 我為眾生說。 磬閏如是知, 亦為眾生說; 無聞能聞故, 是名為聲聞。 其心意勇猛, 官說最上法; 若能知此法, 亦知諸法如。 聲聞說如是, 無染無有漏; 亦為多眾生, 說無染著法。 若知無染界, 清淨無戲論; 於諸佛法中, 欲觀不能見。 猿則不可見; 諸佛所說法, 近亦復無有, 而能得見者。 令多眾生信; 聲聞說是法, 安住是法中, 故名為聲聞。 阿難以是事, 我說是聲聞; 是無依菩薩。 當知是聲聞,

「是故阿難!如來等正覺,以方便力為聲聞人,說菩薩摩訶薩名為 聲聞。

「復次,阿難!云何如來說菩薩摩訶薩名辟支佛?阿難當知!菩薩 摩訶薩,於一切法現見了了,以現見了了故能知聖法,而於諸法不 增不減,覺一切法無有增減,現見了了名辟支佛。覺知一切不可思 議法,覺知一切眾生等同涅槃,而不可得不生不滅,不生不滅故即 是實際,照涅槃際,眾生際,一切諸法無所有際,稱名字際,不可 言說際,不依言說,不可以言說說。所以者何?言說法空不得自 在,言說不能知眾生際及以法際,現見了了覺知此際名辟支佛。現 見色陰,以言說故名為色陰,而此色陰無有言說,離言說故,但以 言說名為色陰,此中無我我所。所以者何?言說說者此二皆空,不 得自在不生不滅,言說無知,云何能說此是色陰,受、想、行、 識?亦應如是了了現見,現見識陰,以言說故名為識陰,而此識陰 無有言說,離言說故,但以言說名為識陰,此中無我我所。所以者 何?言說說者此二皆空,不得自在不生不滅。言說無知,云何能說 此是識陰?於此五陰言說諸緣了了現見,名辟支佛。所以者何?此 陰言說諸緣,此緣無緣非緣能知。阿難!是菩薩摩訶薩名辟支 佛。」

爾時世尊,欲重宣此義,而說偈言:

「現見一切法,知聖法亦然; 無諍不可壞, 畢竟無有相。 現見一切法, 其性相自空; 若知自性相, 畢竟無所有。 與彼法無異; 已逮此現見, 是名為正覺, 難思辟支佛。 眾生如涅槃, 其始不可得; 是名為實際。 無始無終際, 眾牛如涅槃, 畢竟無有生; 若法無有生, 說名為涅槃。 眾生如涅槃, 亦有諸照用; 照用無有我, 故名為涅槃。 眾牛如涅槃, 立種種名字; 不生亦不滅, 以言說故說。 言說性是空, 言說無所知; 以無所知故, 眾生是涅槃。 言說不自在, 無我無有心; 以言說無性, 畢竟無所有。 亦復無所住; 言說不依際, 言說所說者, 難思眾生際。 眾牛際涅槃, 不思議實際; 安隱無戲論, 最勝歸依處。 猶如電光際, 即是眾生際; 無緣無處所, 不思議實際。 無有眾名字; 一切法邊際, 以名字名故, 其際不可得。 實際不可名, 亦無能知者; 眾生際無我, 當知此際空。 言說不依際, 言說無所官; 若能了知此, 無有眾生際。 言不知諸際; 言不自在空, 難思眾生際。 言說所言者, 如是等諸際, 自然能覺知; 難思辟支佛。 是名為正覺, 現見於色陰, 以名字故說; 常離言說故。 此陰無言說,

遠離於所知, 所知名計壽; 能知此所知, 而無有住處。 所說名色陰, 色陰無有我; 畢竟無生滅。 言不自在空, 所言言說性, 畢竟無所有; 以無所有故, 能說色陰名。 受想亦如是, 行識亦復然; 以無有言說, 說是五陰名。 此陰不可說, 亦復不可斷; 不生亦不滅, 無處非無常。 非煩惱出要, 非報亦非業; 非戲論寂滅。 非取亦非捨, 亦非奢靡他, 非毘婆奢那; 非懈怠精進。 非多欲知足, 非掉亦非悔, 亦無有增減; 不得所生法, 而可以為戒。 不修無分別, 官說無分別; 無怖無有諍, 無縛亦無解。 以此入言說, 言說無所入; 言說及諸法, 無言說而說。 自能逮現見, 說法無窮已; 依如是三昧, 不著諸言說。 有此現見智, 知言說平等; 以無言說說。 如言說諸法, 更不復隨他; 已逮此現見, 是名為下覺, 難思辟支佛。

「復次,阿難!菩薩摩訶薩,現見無明及行非生想,知識自性,知名色自性,知六入自性,知觸自性,知受自性,知愛自性,知取自性,知有自性,知生自性,知老死自性,於此法中了了現知名辟支佛。」

爾時世尊,欲重宣此義,而說偈言:

「現見於無明, 畢竟不能生; 猶如水中影, 終始無所有。 明見一切法, 而無動搖相; 若見法如是, 是故名為明。 明性如虛空, 一切法皆爾;

```
若得此現見,
        是名辟支佛。
如說此身行,
        而不在於內;
亦不在於外,
        此身行不生。
身行如芭蕉,
        畢竟無堅固;
不生亦不滅,
        其性如虚空。
無畏諸菩薩,
        若得此現見;
        難思辟支佛。
是名為正覺,
        其性常如幻;
了知一切法,
亦能深信解,
        識無所有性。
觀察如此識,
        所行而虚妄;
以有此知故,
        能知識性空。
已知智非知,
        一切處無染;
若知如是法,
        識則同於幻。
        無受不可說;
如說諸名色,
而知其性相,
        畢竟無所有。
能說諸入性,
        而無有取相;
能如是知入,
        此是性空故。
        住於諸入中;
觸性無不在,
觀察此觸時,
        如幻無所有。
觸性本自空,
        分別故能知;
而此諸觸性,
        住處無方所。
若能現見觸,
        智者能遠離;
有慧遠離觸,
        是名辟支佛。
能知受相空,
        受亦無自性; ◎
如泡不牢固,
        畢竟無所有。
        通達無愛法;
已斷一切愛,
已到愛盡處,
        是名辟支佛。
知取無所取,
        亦知是虚無;
不牛無所有,
        如熱時炎水。
本來諸有想,
        及本有牛想;
若知此性想,
        畢竟無所有。
已離一切老,
        更不復受死;
而於一切處,
        不復更受身。
```

已逮此現見,

以辟支佛名,

「如是阿難!如來等正覺,以方便力為聲聞人,說菩薩摩訶薩名為辟支佛。如是阿難!諸佛如來,說菩薩摩訶薩名為堅信、堅法、八

而無有所依;

官說諸菩薩。

人、須陀洹、斯陀含、阿那含、阿羅漢、聲聞、辟支佛。」 爾時尊者阿難,便說偈言:

「自在導世師, 不可說而說; 於空中作結, 即空而解之。 佛有大方便, 說無著法者; 於不可說法, 而能分別說。」

廣博嚴淨不退轉輪經卷第三

宋涼州沙門智嚴譯

爾時阿難白佛言:「世尊!一切世間必生疑惑不能解了,如來等正覺,以何緣故說堅信、堅法乃至辟支佛耶?」爾時世尊告阿難言:「阿難當知!若有眾生於先佛所造眾善行,能解如來密語不生疑惑。所以者何?能知如來密語,如幻、如熱時炎、如夢所見、如影、如響。阿難!若如是知密語者不生疑惑。是故阿難!菩薩摩訶薩,於如來等正覺密語應如是知。若有勤行精進不得精進,勤修智慧不得智慧者,不生疑惑。」爾時世尊,欲重盲此義,而說偈言:

「諸佛導世者, 微密語難知; 為發大莊嚴, 無異菩薩說。 懈怠無智者, 不能解密語; 應當勤精推, 為解密語故。 如幻炎夢見, 如電亦如響; 以言說顯現, 如是等諸法。 如是知諸佛, 所說微密語; 能以如是慧, 照淨微密智。 不應如是知, 菩提可官說; 應如是覺知, 無言說故空。 空不能知空, 空不分別空; 斷一切分別, 顯示如是空。 虚空無所歸, 亦無有取捨; 以無取捨故, 是故知法空。」

佛告阿難:「若如是知有為法皆悉如夢,而不放逸者,不生疑惑。」

說是法時,五億比丘生堅信想者,即從坐起整其衣服,偏袒右肩右 膝著地,一心合掌皆共和合,住於佛前,而說偈言:

「今日牟尼尊, 除我等疑心; 得解微密義, 以信求菩提。」

復有五億比丘生堅法想者,從諸比丘聞此偈已,即從坐起,乃至合掌,住於佛前,而說偈言:

「今蒙菩提照, 除我等疑冥; 得解微密義, 堅法求菩提。」

復有十億比丘生八人想者,從諸比丘聞此偈已,即從坐起,乃至和 合,住於佛前,而說偈言:

「先住八地心, 今日皆除捨; 得解微密義, 八人求菩提。」

復有十一億比丘生須陀洹想者,從諸比丘聞此偈已,即從坐起,乃 至和合,住於佛前,而說偈言:

「今於佛法中, 得斷諸疑網; 解佛微密語, 宣說須陀洹。」

復有二萬五千比丘生斯陀含想者,從諸比丘聞此偈已,即從坐起, 乃至和合,住於佛前,而說偈言:

「我等本深著, 志樂斯陀含; 今皆得離著, 寂滅無戲論。」

復有五百億比丘生阿那含想者,從諸比丘聞此偈已,即從坐起,乃 至和合,住於佛前,而說偈言:

「今遭救世尊, 遠離諸戲論; 得菩提光照, 永拔諸果想。」

復有三萬五千億得四禪比丘生阿羅漢想者,從諸比丘聞此偈已,即 從坐起,乃至和合,住於佛前,而說偈言:

「我已離煩惱, 通達無異法; 知諸乘平等, 皆悉如幻法。」

復有二萬比丘生聲聞想者,從諸比丘聞說偈已,即從坐起,乃至和 合,住於佛前,而說偈言:

「離縛牟尼尊, 止我等虛說;

密說聲聞義, 我今皆通達。」

復有五千比丘生辟支佛想者,從諸比丘聞此偈已,即從坐起,乃至 和合,住於佛前,而說偈言:

「我等今現見, 辟支佛所行; 解佛微密義, 難思辟支佛。」

復有一萬比丘尼生須陀洹果想,斯陀含果想,阿那含果想,阿羅漢 果想者,從諸比丘聞說偈已,即從坐起,乃至和合,住於佛前,而 說偈言:

「今知平等法, 永斷女身分; 佛無有異言, 必成人中尊。」

復有八萬八千優婆塞,生須陀洹果想,斯陀含果想,阿那含果想者,從諸比丘聞此偈已,即從坐起,乃至和合,住於佛前,而說偈言:

「我等心無垢,如淨毘琉璃; 為修佛法故,今日當出家。」

爾時虛空中,有六十億那由他諸天,以天曼陀羅華而散佛上,散已住立,而說偈言:

「本有諸乘想, 亦有諸果想; 今日悉除捨, 必當成菩提。」

 \bigcirc

爾時有百千阿羅漢,舍利弗,大目揵連,須菩提,阿泥盧頭,離婆多,劫賓那等,即從坐起整衣服,偏袒右肩,右膝著地,一心合掌,皆共和合,住於佛前而白佛言:「世尊!我等今日志願滿足,能降伏魔摧諸怨敵,具足成就五無間業,我等今日滿足成就五欲功德,我等今日邪見具足遠離正見,我等今日害多百千眾生之命,我等今日已逮菩提,即於今日無餘涅槃而般涅槃。」爾時世尊默無所說。

爾時會中有百千眾生皆生疑惑:「我等今者如在闇中,云何諸大羅漢作如是語?何況凡夫,以疑惑故不能從此至彼從彼至此,坐不能立立不能坐。」

爾時尊者阿難,知此百千眾生心之所疑,亦以佛神力故,問文殊師利法王子言:「今此大眾百千眾生,聞諸大德比丘作如是語皆生疑惑,世尊默然而無所說,願文殊師利說其因緣,此諸大德比丘,以何因緣說此密語?」

爾時文殊師利法王子,語尊者阿難言:「阿難當知!此是不退轉菩薩地事,唯有不退轉菩薩,乃能證知此諸大德比丘密語。」

尊者阿難問文殊師利言:「此諸大德比丘,皆是不退轉菩薩耶?」文殊師利言:「如是,如是!此諸大德比丘皆是菩薩,已於菩提得不退轉。」

阿難請文殊師利言:「願說諸大德比丘微密語義。」

文殊師利言:「無明能生生死,是故名母,斷無明故名為害母。父 名不正思惟及以喜愛,彼以永斷名為害父。以諸法不可壞,方便壞 眾多想,亦壞諸行名為壞僧。應壞凡夫法名阿羅漢,以不滅方便滅 羅漢想名殺羅漢,以不滅方便滅如來想名出佛身血,如是等想已斷 已害畢竟無餘。阿難!以是事故,諸大德比丘作如是語:『我等今 日具足成就五無間業。』所以者何?於此法中不聚、不散、不減、 不滿,是故名為五無間業滿足成就。阿難當知!彼作是說:『我等 今日滿足成就五欲功德』者,彼諸比丘於此五欲,了知如夢、如 幻、如熱時炎、如影、如響,彼於此智滿足成就,而於五欲無增無 减。所以者何?能知此法畢竟而無所有。以無所有故能如實知,而 於彼法得如是忍,故名滿足成就五欲功德。阿難!以是事故,彼諸 比丘作如是說:『我等今日滿足成就五欲功德。』阿難當知!彼作 是說:『我等今日滿足成就邪見遠離正見』者,彼諸比丘知諸法 邪、見諸法邪。阿難!邪名有為諸法皆是虚妄,此虚妄法猶若虚空 不增不減,亦不住方亦無所屬。所以者何?離自性故。彼知是法皆 悉平等,以平等故正見亦等,彼已遠離如是等想。所以者何?若有 等想有不等想,彼諸比丘無有等想及不等想。所以者何?諸佛之法 離一切想,彼於佛法通達無生,不得無生法。是故阿難!彼諸大德 比丘作如是語:『我等今日具足成就邪見遠離正見。』阿難當知! 彼作是說:『我等今日害多百千眾生命』者,阿難!彼諸比丘令此 時會百千眾生諸天及人,知有為法皆悉如幻、如影、如響,知此法 故,離眾生想、離壽想、人想,離一切法想,以一切法不可種方便 種菩提善根。諸比丘、比丘尼、優婆塞、優婆夷、從諸比丘聞此密 語,亦得離眾生想、壽想、人想,不數數死。所以者何?若著眾生 想、壽想、人想則數數死,彼已遠離如是法故畢竟不生。是故阿 難!彼諸比丘作如是說:『我等今日害多百千眾生命根。』阿難當 知!彼作是說:『我等今日已逮菩提,於無餘涅槃而般涅槃』者, 阿難!彼諸比丘,令此大眾百千萬億那由他諸天及人,即於今日得

離煩惱得逮菩提。所以者何?此諸大眾皆發阿耨多羅三藐三菩提心,而於今日聞說金剛句法,皆得無生法忍得見菩提,以是事故而作是說:『我等今日逮得菩提,我等今日於無餘涅槃而般涅槃』者,彼不斷煩惱不修佛法無餘煩惱。是故阿難!彼諸比丘作如是說:『我等今日已逮菩提,於無餘涅槃界而般涅槃。』言今日者,阿難當知!即於此日不生亦無所生,故名今日。(天竺正音不生與今日音同也)是故阿難!求菩薩乘若善男子、善女人發阿耨多羅三藐三菩提心者,於一切法應當漸損,以不可得法發菩提心,於一切法是名為出離菩提想,於一切法是名為入無餘涅槃而般涅槃。阿難!求菩薩乘族姓子,不應深著日想,不應以日而生畫想。阿難!惠小之人以日為畫想,無點慧故。所以者何?若令此畫是真實、是堅牢、是常住者,應有積聚不應過去,唯應有畫不應有夜。阿難當知!有畫夜想者此是凡小。是故阿難!求菩薩乘族姓子有深心者,為善知識所護,不應生畫夜想。所以者何?求離一切想是菩提道故。」爾時文殊師利法王子,欲重宣此義,而說偈言:

「無明名為母, 能生生死故; 已拔其根本, 是故名為害。 不下觀思惟, 喜愛名為父; 彼皆如實知, 畢竟無所有。 以知無所有, 而害其根本; 不緣無所有, 是故名為害。 所說羅漢法, 及與凡夫法; 彼已以智壞, 是故名為害。 所有眾多相, 已知其性相; 以不可壞法, 壞相名壞僧。 本來所分別, 如來諸法想; 彼已斷遠離, 知其不牛滅。 此想次第起, 思量知是空; 如所說平等, 彼已能證知。 所說欲功德, 其名有万種; 遠離此諸想, 知想皆如幻。 是諸比丘等, 於欲無增減; 而作如是說。 於導世師前, 知欲性皆空, 猶如夢所見; 於此智得滿。 畢竟無所生, 以邪智知法, 虚偽不牢固; 邪名為虚妄, 於此智得滿。

有為法虚妄, 而無有遠折; 如五指摩空。 無知無折遠, 皆見是平等; 彼說諸下見, 如諸法平等, 知見等亦然。 眾生想故死; 凡小多分别, 若不得眾生, 亦無有死想。 有緣諸眾生, 除其計壽想; 知計壽過患, 除其如是想。 遠離眾牛想, 及與計壽想; 害多眾生命。 彼作如是說, 已遠離死想, 達無分別法; 知不壞菩提, 不增無果報。 死牛不可聚, 覺了清淨法; 一切法無諍, 不生常寂滅。 不應分別書, 亦不分別夜; 於不來去法, 而求於菩提。 凡小恒分别, 以日用為書; 欲求菩提者, 莫作是分別。 宣說如是法; 彼以是密語, 以知此法故, 能作如是說。」

文殊師利法王子說此偈已,爾時會中百千眾生已拔疑箭,無復疑惑逮大照明,於諸法中得無生法忍,各自脫身所著上服,以奉文殊師利法王子,皆作是言:「願使我等於未來世,說是妙法覺悟眾生,如今文殊師利法王子覺悟眾生。」

爾時世尊告文殊師利言:「善哉,善哉!文殊師利!除眾生疑照明佛法,法應如是。」

爾時阿難白佛言:「世尊!今此百千眾生所有疑箭,非是世尊所拔斷耶?」

佛告阿難:「今此百千眾生,皆是文殊師利本所教化成就菩提,聞 彼說法皆能信解。」

阿難白佛言:「是諸眾生皆於菩提不退轉耶?」

佛告阿難:「如是,如是!是諸眾生已於菩提而不退轉。所以者何?為文殊師利善知識所護念故。」

爾時阿難白佛言:「世尊!此諸比丘,生堅信想,生堅法想,生八人想,生須陀洹想,生斯陀含想,生阿那含想,生阿羅漢想,生聲聞想,生辟支佛想者,皆於菩提不退轉耶?」

佛告阿難:「是處難信,樂小法者,懶惰、懈怠、不勤精進、貪著 飲食、貪著欲染,親近樂行欲染法者,好喜談說無益之語,亂心失 念不具威儀,心意躁擾不攝諸根,輕躁嬉戲愚佷多語,如是眾生信 是法難。阿難!著增上慢不能護身貪著身命,遠閑居處捨多聞法, 破戒憍慢毁法竊法,不尊重法毀滅正法,貧窮法財喜樂非法,誹謗 正法樂行非法,不知恩報恩,不敬佛法僧。阿難!如是眾生信是法 難。慳心堅著惡戒瞋心,不解佛法,成就惡慧貧窮智慧,惡友所護 遠離善友,不為般若波羅蜜所護,不為諸陀羅尼經王所護,起有得 見,深重利養貪著衣鉢,於衣鉢物極生重心,不尊重和上、阿闍 梨,於初夜後夜不勤行方便。阿難!如是眾生信是法難。殺生、偷 盗、邪婬、妄語、兩舌、惡口、說非時語,貪、瞋、邪見、親近邪 見,修行廣布邪方便法,無慚無悔朋黨交遊,獨行無伴離沙門法, 行非沙門法,不信空無相無作無為不生不滅一切諸法非破壞相。阿 難當知!如是眾生信是法難。」爾時世尊說是語已,即便默然。 爾時阿難承佛威神問文殊師利法王子言:「文殊師利!世尊何故默 無所說? 」

文殊師利言:「將來惡世眾生,成就如是惡不善法,不能信解如是 深法,以是事故世尊默然。」

尊者阿難問文殊師利言:「來世眾生少有信解如是法不?」

文殊師利言:「來世眾生信此法者甚少,猶如眾生不識珍寶者多、識者甚少。所以者何?非其智力所及。阿難!眾生亦爾,聞說此法信解者少;設有信解如是法者,不為國土城村人民所敬,國土人民咸共輕賤而遠離之。所以者何?此人先世作法留難業因緣故,今受此報。」

阿難請文殊師利言:「惟願為此少信解眾生敷演此義。」 文殊師利言:「此事問佛,佛當演說。」爾時阿難,即便問佛。 爾時世尊,四面顧視,即出舌相,遍覆三千大千世界,於其舌相復 放光明,遍照十方恒河沙世界,皆令周遍。時四部眾,佛神力故, 皆見十方恒河沙諸佛世界諸佛世尊,皆說是法悉得聞知,聞是法已 皆共和合勸請世尊:「唯願如來宣說此法莫令斷絕。世尊!今十方 諸世界中,無量無邊不可限量諸佛世尊宣說是法,我等悉得見聞, 其所說法無有增減,如今世尊等無有異。」

爾時世尊還攝舌相告阿難言:「汝頗曾見不實語人有是廣長舌相不耶?」

阿難白佛言:「無也。世尊!此是世尊誠實說于戒定忍辱,憐愍饒益慈悲喜捨,一切智果所得舌相。是故世尊!唯願為此少信眾生族姓男女敷演此義,因是事故,諸不信者以此證知,皆令得信。」

爾時世尊告阿難言:「今此四眾諸來會者,比丘、比丘尼、優婆塞、優婆夷,天、龍、夜叉、乾闥婆、阿修羅、迦樓羅、緊那羅、摩睺羅伽、人非人等,聞說此法者,皆於阿耨多羅三藐三菩提不退轉,漸次修行,當得阿耨多羅三藐三菩提,即於此處宣說是法無有增減,如我今日等無有異。」

爾時四眾比丘、比丘尼、優婆塞、優婆夷,天、龍、夜叉、乾闥婆、阿修羅、迦樓羅、緊那羅、摩睺羅伽、人非人等,皆大歡喜踊躍無量;其中或有以衣散佛者,或以華者,或以諸鬘,所謂須曼那鬘,金鬘銀鬘,毘琉璃鬘,頗梨鬘,車璩鬘,馬瑙鬘,象瑙鬘,日光寶鬘,雜七寶鬘,以如是等鬘,而散佛上。諸天以曼陀羅華,摩訶曼陀羅華,渡流沙華,摩訶波流沙華,摩訶盧遮摩禰華,摩訶盧遮摩禰華,摩訶盧遮摩禰華,鄭娑摩禰華,摩訶盧遮摩禰華,如是等諸華而散佛上。復以天優鉢羅華,波頭摩華,拘物頭華,分陀利華,而散佛上。於虛空中作天伎樂,種種歌頌讚歎佛德。諸龍王等皆兩真珠散於佛上。一切女人即脫身上妙好瓔珞以散佛上,脫身上服以用奉佛,即整衣服右膝著地,一心合掌住於佛前,皆共和合而作是言:「諸佛如來,言無有二智無障礙,記說我等必當作佛。」

爾時世尊告阿難言:「如是阿難!是諸女人必於阿耨多羅三藐三菩提不退轉。所以者何?諸佛世尊,永斷愚癡、貪欲、瞋恚及諸憍慢塵垢黑闇一切染著,燒燃煩惱永盡無餘,成就精進成就諸力,威德尊嚴神足自在光明照曜,眷屬成就尊貴威勢,色族姓處皆悉具足,相好具足光明具足到安隱處,如釋如梵如欲界中尊,威儀具足、戒行具足、觀察具足。天、龍、夜叉、乾闥婆、阿修羅、迦樓羅、緊那羅、摩睺羅伽、人非人等,皆共尊重恭敬讚歎不染世法,永捨一切諸有為法,成就解脫諸佛之法見聞不虛。」

阿難白佛言:「世尊!云何諸佛世尊聞不虛耶?」

佛告阿難:「汝不知耶?」

阿難白佛言:「世尊!實所未知,唯願說之,云何如來聞不虚耶?」

佛告阿難:「一心善聽,吾今解說。阿難當知!若有眾生,已聞、 今聞、當聞釋迦牟尼佛名者,是諸眾生,皆於阿耨多羅三藐三菩提 不退轉。所以者何?諸佛菩提無虛妄故,亦無貪欲及以瞋恚。阿 難!何況今日現於我前能以一華散我上者;若有眾生,我泥洹後形 像舍利,能持一華以供養者,如是眾生亦於阿耨多羅三藐三菩提不 退轉。」

阿難白佛:「若有畜生聞釋迦牟尼佛名者,皆於阿耨多羅三藐三菩 提不退轉耶?」 佛告阿難:「若有畜生聞釋迦牟尼佛名者,是諸眾生皆種阿耨多羅 三藐三菩提種子因緣。所以者何?諸佛如來,其有聞者聞必不虛, 是故諸佛如來言無有二。阿難!譬如尼拘陀樹枝葉茂盛,能蔭百人 至五百人。阿難!於意云何?其樹種子為大小耶?」

阿難白佛言:「世尊!其子甚小。」

佛告阿難:「是尼拘陀樹種子雖小,得地、水、火、風、虚空眾緣故,而得生長漸次廣大。如是阿難!彼諸眾生種菩提種子漸次增長,當成阿耨多羅三藐三菩提,而不可腐敗不可敗壞。所以者何?以不住一切法作種子故,而不腐敗亦無毀壞。」

爾時阿難白佛言:「世尊!為是諸佛本願之力?為是諸佛法應爾耶?」

佛告阿難:「是我本願,若有聞我名者,必不退轉阿耨多羅三藐三菩提,亦是諸佛法應如是。所以者何?一切諸佛法皆等故。」

阿難白佛:「若諸佛法等,以何緣故立誓願耶?」

佛告阿難:「諸佛世尊宣說法時,會中諸菩薩摩訶薩,聞佛說法即立誓願:『使我將來成佛說法,見聞不虛亦復如是。』」

爾時阿難白佛言:「甚奇世尊!成就如此希有之法,復以此法利益眾生。」

佛告阿難:「如是,如是!如汝所說。我為利益諸眾生故,遍諸佛 土供養諸佛不惜身命,捨一切物無有慳悋,勤修精進積集難得,無 所依倚菩提之道,於一切法而無所取,以攝眾生。」 廣博嚴淨經卷第四 ◎爾時阿難白佛言:「世尊!甚為希有,魔王波旬,聞說此經不作留難。」佛告阿難:「以不聞故不作留難。所以者何?文殊師利法王子,以神力隱蔽令不得聞故無留難。」

爾時文殊師利法王子還攝神力,惡魔波旬即於夢中聞說新異不退轉法輪,亦聞稱釋迦牟尼佛名,即便驚悟,愁憂恐怖身毛皆竪,即從床上自投於地,作如是言:「先所降伏今不伏我,先所領土今不屬我。」愁憂苦惱發聲啼哭,以愁憂苦惱發聲啼哭故,身形老瘦猶如百歲老人。爾時惡魔波旬,將四種兵及三千大千世界所有魔天,來詣佛所;猶如菩薩坐道樹時,魔嚴兵眾來詣佛所亦復如是。爾時惡魔波旬,身形老劣如百歲人,頭低脊膢行步遲重,喘息短氣舉身戰掉,扶杖而行來詣佛所。當魔波旬來詣佛時,於虛空中所將眷屬四種兵眾,聞說不退轉法輪,亦聞釋迦牟尼佛名。時四種兵及諸眷屬,自然而住不能得前,生如是念:「我等不復隨從波旬。」爾時波旬單獨羸老,白佛言:「乃至不留一人扶接我者,本降伏者今不伏我,先所領土今不屬我。世尊憐愍一切眾生,我今亦在眾生數中而不垂愍,乃至不留一人授我水者。」

爾時世尊告波旬言:「眾生界多是無盡法。波旬當知!假令日日恒河沙等諸佛出世,一一諸佛於日日中度恒河沙眾生令般涅槃,而眾生界猶不可盡。」

時魔波旬復白佛言:「眾生界雖不可盡,如我今者單獨羸老,在道行時若其顛躄,乃至無有扶接我者。唯願世尊,安慰我意,令我歡喜速得還去。」

佛告波旬:「且安意去,若有眾生,不信不解不退法者,是諸眾生 皆屬於汝,是汝眷屬汝得自在,一切皆是扶接汝者。」

爾時波旬聞是語已,歡喜踊躍作如是言:「我今當為眾生作諸留難,令於此法不信不解生於疑惑,生疑惑故當屬於我,我得自

在。」爾時波旬復白佛言:「唯願世尊,重安慰我令我歡喜而得還去。佛自說言:『若有眾生聞我名者,皆於阿耨多羅三藐三菩提而不退轉。』從今已往更莫復說。所以者何?若有眾生聞此語已,勤行精進求佛菩提。」

爾時世尊告波旬言:「汝安意去!我當令諸眾生乃至無有住菩提者,亦復無有出眾生界者,無有眾生離色陰者,離受、想、行、識陰者。波旬且安意去!我常令諸眾生,無有離身見者,離戒取、見取者,離有所得者,離六十二見者,離過去、未來、現在想者,離

殺生者,離不與取、邪婬者,離妄語、綺語、惡口、兩舌者,離貪恚、邪見者。波旬且安意去!我不教眾生而行布施、持戒、忍辱、精進、禪定、智慧,亦不教眾生行四攝法,不令眾生離眾生想,離堅著想,離父母想,離兄弟、姊妹、男女想,離晝夜想,離半月、一月、一年想,離布施、持戒、忍辱、精進、禪定、智慧想,菩提心想,力、無畏想,根、力、覺、道想,佛、法、僧想,障菩提想,一切種智想。波旬汝且安意去!我當令眾生於一切法無遠離想。」

爾時波旬歡喜踊躍拔愁憂箭,即於是處還復本形,以諸天花而散佛上, 遶佛三匝住於佛前,而說偈言:

「今日兩足尊, 說此微妙音; 佛無有二言, 今我大歡喜。」

時魔波旬說此偈已,歡喜安意漸離佛去,還本天宮皆共和合,受五欲樂以自娛樂,更不復生留難之心。

說此降伏遣魔法時,大地六種震動。阿難白佛言:「世尊!以何因緣大地震動?」

佛告阿難:「說此降伏遣魔法時,六萬四千菩薩,於諸法中得無生法忍。」

阿難白佛言:「世尊!今此會中頗有疑惑是法者不?」

佛告阿難:「今此會中有十億眾生,皆生疑惑心意迷悶,作如是說:『為是何語,將非我等錯謬聞耶?』以是事故不知時方,亦不自知從何所來欲至何所,以疑惑故各不相見。」

阿難白佛:「唯願世尊,以慈悲心為此眾生速作照明,莫令此眾懷疑惑故墮於惡趣。以何因緣而作是說:『惡魔波旬且安意去!我不令眾生住於菩提,乃至波旬且安意去!我不令眾生於一切法無遠離想。』唯願世尊!為此眾生速作照明,亦令將來眾生逮照明故,受持此法而不忘失,願分別說。」

爾時世尊,便說偈言:

「菩提無住相,亦無能住者; 是故說眾生,無住菩提者。 菩提與眾生,無二無有異; 是故說眾生,無住菩提者。 亦無有眾生,能離眾生界; 無所有不生,畢竟不可得。 難思眾生界,其性本自空;

假令一切智, 不見其離想。 我所說諸陰, 無眾生能離; 此陰與眾生, 無異常寂滅。 已知陰是空, 而不離其性; 說其體是一, 不可取而離。 已能知諸陰, 不取不可離; 畢竟無所依。 無我無自性, 諸陰如虚空, 陰所行亦爾; 行無所行故, 說陰如虚空。 非生非能生; 如說虚空界, 陰性亦如是, 無有能離者。 無法而可得; 身見自性相, 以不可得故, 我說不可離。 疑無有自性, 畢竟不可得; 以不得疑故, 眾生無能離。 無有諸眾生, 能持選擇戒; 見取諸眾生, 亦復不可得。 計有得法者, 眾生不可得; 有得法無心, 不離於自性。 如所說諸見, 凡有六十二; 如是等諸見, 皆如水中影。 已知此諸見, 皆如水中影; 無我無所有, 自性不可得。 過去未來想, 及與現在想; 此想無所有, 亦如水中影。 此想無有我, 眾生不可得; 以不得眾生, 是故不可離。 殺害諸眾生, 必趣嶮惡處; 安置涅槃中, 無有能動者。 眾生若可得, 可有離動相; 眾生無有實, 故說不可離。 菩提名不與, 未曾有與者; 雖勤作方便, 而無動離者。 不行施眾生, 教行勝法施; 雖勤作方便, 而無動離者。 亦不得眾生, 依倚婬欲者; 可與非邪合。 欲中無有邪, 妄語諸眾生, 有緣者應化;

雖勤作方便, 而無動離者。 兩舌與惡口, 及以非時言; 如響令人惑。 如是等言說, 此法無處所, 亦不可染著; 此諸聲如響, 知其無所依。 本所有無明, 深計著於我; 以知我真實, 無能動離者。 亦能知瞋恚, 畢竟無有相; 菩提無相故, 無能動離者。 若能知邪見, 是名為正見; 以過著見法, 無能動離者。 不教諸眾生, 而以女色施; 賢聖所禁制, 是施有過患。 邪見所持戒, 聖道所捐棄; 智者不應教, 以此求聖法。 外道所稱讚, 種種諸忍相; 令人到涅槃。 此忍非正道, 外道所稱讚, 五熱精進法; 不能至菩提, 智者應捨離。 外道諸禪定, 盡行諸有想; 非諸佛所讚, 是以不教他。 教化諸眾生; 不用世俗慧, 此慧不能得, 不思議佛慧。 於清淨眾生, 成就無畏者; 我說於是眾, 不行四攝法。 深敬念佛者, 不教離是著; 佛有無染智, 亦無諸障礙。 深敬念法者, 不教離是著; 離欲最勝法, 云何而可離? 不著眾生想, 而發菩提心; 菩提不可著, 云何而得離? 父母及兄弟, 姊妹男女想; 此想皆如幻, 云何而可離? 此想一切處, 無法無所有; 云何而可離? 無法無有故, 書想及夜想, 半月一月想; 如熱時炎水。 此想無直實, 施想與戒想, 忍辱精谁想;

此想非真想, 云何以想離? 定想及慧想, 菩提心之想; 是想皆虚誑。 力無畏諸根, 諸覺及道想, 佛想與法想; 皆從無知起, 云何離此想? 分別諸僧想, 此想亦眾多; 從分別起故, 我說不可離。 及一切智想; 不著菩提想, 此想遠諸佛, 不思議菩提。 以是故我說, 波旬無智人; 不離此諸想, 而猿求菩提。 諸法及菩提, 皆悉知如如; 官說不離義, 去魔憂惱心。」

世尊決定說此降伏遣魔法時,會中十億眾生,拔猶豫箭無復疑惑, 逮大照明,於諸法中得無生法忍。會中十億眾生皆共和合,住於佛 前,而說偈言:

「不思議佛道, 今我以證知; 佛是導世師, 除斷我疑心。

以逮大照明, 安住佛法中;

諸方明淨故, 得見一億佛。

亦得見其法, 知色等不生;

遭遇救世師, 得淨如是智。

亦得見一億, 諸佛嚴淨土;

無上導世師, 皆悉住其中。」

爾時十億眾生說此偈已,脫身所著上妙之服,為供養法歡喜奉佛,作如是言:「願令此法流布,一切眾生皆得耳聞。」

爾時阿難白佛言:「世尊!若有眾生,聞是降伏遣魔法者,能信能解不生疑惑,是善男子、善女人得幾所福?」

佛告阿難:「若善男子、善女人,聞此降伏遣魔法,一經耳能信能 解不疑惑者,功德甚多不可限量。」

阿難白佛言:「其所得福可以方喻知不?」

佛告阿難:「若善男子、善女人,於日初分供養百千諸佛,於日中分供養百千諸佛,於日後分供養百千諸佛,尊重讚歎,以上妙房舍一切所須皆悉充足,經百千劫,是善男子、善女人,所得功德寧為多不?」

阿難白佛言:「世尊!甚多甚多,不可限量難以喻知。」

佛告阿難:「若善男子、善女人,聞此降伏遣魔法,一經耳能信能解不疑惑者,其福勝彼。」

爾時虛空中有三善男子求菩薩乘,自然而現漸漸而來,各各執持千大蓮花,其花高廣踰須彌山,有百千萬億葉,出百千萬億光色。爾時尊者阿難及諸時會,皆共遙見三善男子求菩薩乘者,漸漸而來,見已生希有心。爾時阿難白佛言:「世尊!此善男子為從何來?」佛告阿難:「東方過恒河沙佛土有世界,名花高須彌山,此善男子,於彼世界,聞說此法及上因緣,以是故來。」

阿難白佛:「彼世界佛名號何等?」

佛告阿難:「彼佛名華高須彌山王如來等正覺,今現在說法。」 爾時三善男子求菩薩乘者,前詣釋迦牟尼佛,頭面禮足右遶三匝, 右膝著地一心合掌,以所執華而散佛上,作如是言:「世尊!我等 今於此法,能信能解不生疑惑。所以者何?我等於此法中,無有疑 惑猶如如來。」

爾時第一善男子求菩薩乘者白佛言:「世尊!若作是說:『我是如來。』此言便是正說。所以者何?我於此法不生疑惑故。」爾時第二善男子求菩薩乘者白佛言:「世尊!若作是說:『我是世尊。』此言便是正說。所以者何?我於此法不生疑惑故。」爾時第三善男子求菩薩乘者白佛言:「世尊!若作是說:『我是佛。』此言便是正說。所以者何?我於此法不生疑惑故。」◎

◎爾時會中百千眾生,心皆擾動不安本坐,作是念:「無有二佛並出世間,今此善男子,以何等故發如是言?」作是念已,展轉相語:「且共默然。世尊在座,自當解說此諸菩薩如是語義。」爾時阿難白佛言:「世尊!此諸菩薩名字何等?乃能作是大師子吼。」

佛告阿難:「其一菩薩名樂求如來音聲,第二菩薩名樂求世尊音聲,第三菩薩名樂求佛音聲。阿難當知!以是緣故,彼菩薩摩訶薩作如是說。」

阿難白佛言:「世尊!今此會中有百千眾生,心皆擾動作是念: 『無有二佛並出世間,以何緣故彼作是說?』唯願如來敷演其義, 令此大眾心不擾動,所種善根增益明淨。世尊!如人澡浴嚴治髮爪 膚色鮮淨,復以赤栴檀水更浴其身,膚色鮮淨倍勝於前。世尊!是 諸眾生亦復如是,若聞說是語義,所種善根增益,明淨倍勝於 前。」

爾時世尊,即說偈言:

「皆共一心聽, 我說是語義;

何故名如來, 世尊及佛耶? 亦知未來如; 能知過去如, 見一切法如, 是故名如來。 如先昔諸佛, 行不思議施; 我亦行此施, 是故作是說。 如先昔諸佛, 求無依倚道; 是故名如來。 我亦如是求, 不住一切法, 求寂靜菩提; 亦不得菩提, 是故名如來。 如昔諸菩薩, 勤苦行忍辱; 能到忍彼岸。 我亦行是忍, 如我昔精進, 勤求於菩提; 是故名如來。 彼亦勤精進, 彼已能通達, 諸法平等相; 亦不生心念, 是故名如來。 其性常平等; 不念一切法, 知此平等已, 而無差別心。 如如平等定; 已能通達此, 通達此定故, 是故名如來。 所說一切法, 各白有性相; 已知此性相, 畢竟常寂然。 知虚名為智; 知相名為慧, 若能知眾生, 名到慧彼岸。 如先昔智者, 智慧到彼岸; 亦不得此慧, 到彼岸寂然。 彼亦得此慧, 而到於彼岸; 是故名如來。 不得此慧故, 不得菩提如, 其性相難議; 不得一切法, 是故名如來。 已能逮無著, 不著如如來; 不著一切法, 通無著道故。 如先導世師, 能知見正道; 此道直實相, 未曾有始終。 彼亦如是修, 最勝無上道; 此道無始終, 性空無所有。 知道無始終, 諸法皆平等; 亦知如平等, 是故名如來。 道如菩提如, 及與不住如;

知如如虚空, 是故名如來。 我所說諸法, 其如常平等; 若能見此如, 應當求菩提。 彼作如是說; 阿難以是事, 如說能修行, 彼亦如是行。 若能行是行, 能作如是說; 知是不退轉, 無畏諸菩薩。 無畏諸菩薩; 阿難應當知, 能作如是說, 自言是如來。」

阿難白佛言:「世尊!以何因緣,得何等法,名世尊耶?」 爾時世尊,便說偈言:

「皆共一心聽, 於百千億劫; 求如是菩提, 無量難思議。 為諸眾生故, 求如是菩提; 未曾有怖畏, 是故名世尊。 不畏於生死, 正住生死中; 化度諸眾生, 是故名世尊。 云何不怖畏? 云何住牛死? 云何度眾生? 云何名世尊? 生死無有法, 而可破壞者; 不牢不破壞, 以此度眾生。 是名不怖畏, 是名住生死, 是名度眾生, 是名為世尊。 知諸法虚空, 而無怯弱心, 官說諸法相, 而無所怖畏。 已斷諸怖畏, 遠離諸難處; 不畏難處故, 度難處眾生。 度多億眾生, 過生死嶮難; 亦不得生死, 及所度眾生。 安置諸眾生, 寂靜涅槃岸; 亦不得眾生, 是名為世尊。 恒為諸眾生, 說如虚空法; 未曾生怖畏, 是名為世尊。 法性無差別, 說有種種名; 平等如菩提, 菩提不可得。 教導諸眾生, 今趣向菩提;

雖教如是法, 未曾有所說。 度脫多眾生; 不可說而說, 無畏無所取, 是故名世尊。 能修菩提相; 遠離一切想, 已過一切想, 是名為世尊。 已能滅諸想, 煩惱無有餘; 名之為世尊。 以是故得稱, 以慧觀諸法, 知諸法平等; 常不求少法, 是故名世尊。 亦不求名譽; 不重於名譽, 恒為諸眾生, 說離名譽法。 菩提離名譽, 彼亦如是求; 若有重名譽, 是名遠菩提。 分別故多種; 是聲猶如響, 横生諸分別, 我有如是名。 不著一切聲, 亦不依倚名; 是名為世尊。 無戲論菩提, 名之為世尊; 知如是諸法, 亦不得菩提, 是故名世尊。 知如是諸法, 而無有所著; 求如是菩提, 解脫無有漏。 及諸餘因緣; 阿難!以是事, 菩薩摩訶薩, 自言是世尊。」

阿難白佛言:「世尊!以何因緣,得何等法,名為佛耶?」 爾時世尊,便說偈言:

此法無所有; 「覺知一切法, 已覺無有法, 是故名為佛。 不令得自在; 覺了諸煩惱, 以智離煩惱, 是故名為佛。 能覺此身空, 此身無所屬; 此身不牢固, 牢固不可得。 愚於不牢身, 而牛堅牢想; 是故名為佛。 彼如實覺知, 覺無明無智, 自性無所有; 已得於明智, 是故名為佛。 所有過去想, 覺知是無想;

知想無相故, 更不隨此相。 修未來諸想, 現在想亦然; 是故名為佛。 已修一切想, 覺知色前際, 未曾有生起; 凡小雖分別, 不能今色生。 覺受無根本, 根本不可得; 於一切法中, 亦無有受者。 知想猶如幻, 其性無所有; 於一切法中, 不為想所累。 知行不能作, 種種諸身相; 身空行亦空, 是故無所作。 知行及與身, 猶如芭蕉樹; 如實能覺知, 是故名為佛。 觀識之實性, 亦不在身內; 亦不在身外, 而可有是識。 於一切法中, 識性不可得; 而於此身中, 無形無處所。 能如是知識, 識性無所有; 無想猶如幻, 未曾見識生。 無有見識者; 於一切法中, 一切眾生性, 未曾有作者。 眾生無作者, 諸法畢竟然; 若法若眾生, 無有來去相。 覺一切諸法, 畢竟無有相; 無分別戲論, 是故名為佛。 如諸佛不住, 佛正法大乘; 不住一切法, 是故名為佛。 如如諸法如, 諸佛不住如; 是竟不可得。 佛如菩提如, 為求菩提故, 應發如是心; 能覺此心相, 少法不可得。 為求菩提故, 應發如是心; 此心菩提等, 亦覺知如幻。 阿難!以是事, 彼作如是說; 自言我是佛, 如佛導世師。 以佛之名聲, 說如是等法; 若有住此法, 盡應求菩提。 若有知此法, 是則折菩提;

於一切法中, 不生諸疑惑。 於諸法無疑, 必為世間上; 已知此法故, 能解密語義。」

爾時世尊,說如來世尊佛名已,是時會中百千眾生白佛言:「世尊!我等無復疑網逮大照明,得解菩薩摩訶薩名為如來、世尊、佛義,以一切法不可得故,於諸法中逮得法忍。如來今者猶如父母矜接我等,不令我等心有擾動,亦得覺知不擾動法,猶如虛空不可擾動。所以者何?我等今者覺一切法,猶如虛空無擾動故。」爾時會中百千眾生,頭面禮佛右遶三匝,去佛不遠默然而坐。爾時會中有菩薩摩訶薩,名常笑諸根清淨,即從坐起,以種種華而散佛上,即說偈言:

「眾生多果想, 能解彼果想;

離果得具足, 故禮世間智。

眾生貪著果, 行種種果名;

唯佛能除解, 故禮世間智。

宣說果平等, 而以覺悟他;

說果是假名, 故禮世間智。

官說平等法, 住平等法中;

覺一切法等, 故禮世間智。

眾生得果想, 除此有得心;

唯佛能除斷, 故禮世間智。

具知果寂滅, 不住種種果;

諸佛善密語, 故禮世間智。」

爾時常笑諸根清淨菩薩摩訶薩,說是偈已,讚歎世尊,頭面禮足右 遶三匝,去佛不遠一心觀佛,目不暫眴歡喜而住。 爾時會中有菩薩摩訶薩,名蓮華德藏,即從坐起,以花散佛,說此 偈言:

「眾生多有想, 能解此有心;

離怖無所取, 故禮牟尼尊。

於諸有寂靜, 說無所有法;

遠離一切有, 故禮牟尼尊。

知有是空無, 其性無有我;

以遠離有畏, 故禮牟尼尊。

遠離諸憂感, 能拔憂感者;

永斷諸繋縛, 故禮牟尼尊。」

爾時蓮華德藏菩薩摩訶薩,說此偈已,讚歎世尊,復更說偈,而白佛言:

「於後惡世中, 若有聞此經; 不生怖畏者, 皆應合掌禮。」

爾時無垢意菩薩摩訶薩,即於佛前,而說偈言:

「若有聞此經, 不生疑惑者; 於一切時中, 應以眾花散。」

爾時廣思惟菩薩摩訶薩,即於佛前,而說偈言:

「此經中廣說, 無量諸佛法;

眾生聞是法, 不疑惑者少。

貪著於己身, 生種種身想;

得聞如是經, 云是顛倒說。

當知屬於魔, 為魔所抑持;

無智聞此經, 返更生疑惑。」

爾時青蓮華目菩薩摩訶薩,即於佛前,而說偈言:

「若有聞此經, 不生疑惑者; 猶如世間眼, 亦名施眼者。」

爾時樂供養塔菩薩摩訶薩,即於佛前,而說偈言:

「若有聞此經, 深生信樂者; 此人處世間, 猶如最上塔。」

爾時渴仰意菩薩摩訶薩,即於佛前,而說偈言:

「雖在生死中, 應數生渴仰; 不著一切法, 能不疑此經。」

爾時樂以衣施菩薩摩訶薩,即於佛前,而說偈言:

「應以多億衣, 細軟而平正; 以供覆其身, 不疑此法者。」

爾時樂以食施菩薩摩訶薩,即於佛前,而說偈言:

「所說諸餚饍, 味中最上者; 應以供其人, 不疑此法者。」

爾時悲念樂見眾生菩薩摩訶薩,即於佛前,而說偈言:

「悲念諸眾生, 應數數涕泣;

而於此經中, 無有信樂意。

若人少時間, 疑惑於此經;

當知地獄來, 還趣向地獄。

親近惡知識, 不解是深法;

無明網所覆, 不向此妙趣。

破戒自纏裹, 惡意好求短;

貪著於利養, 能誹謗是經。

不勤求菩提, 懈怠不精進;

惡慧樂小法, 不信解是經。

貪利養眾生, 計我隨愛欲;

深著於三世, 不能信是經。

愚恨惡心性, 染愛盲無智;

好樂多談說, 而不信是經。

好選擇衣服, 貪味嗜飲食;

少於白法者, 能誹謗是經。

著果諸眾生, 好說著果法;

解佛微密語, 如是者甚難。

過去先昔佛, 無上導世師;

盡能供養者, 能信解是經。」

爾時遠離惡法菩薩摩訶薩,即於佛前,而說偈言:

「愚心貪著果, 能誹謗是經;

應遠離是人, 猶如臭糞穢。

亦如爛死屍, 行者皆遠避;

謗此經眾生, 皆應常遠離。

猶如劫村賊, 住大曠野中; 聞者皆馳走, 恐為我作難。 應如是馳走, 遠離是惡賊; 瞋恚懷惡意, 誹謗是經者。」◎

廣博嚴淨經卷第五

宋涼州沙門智嚴譯

◎爾時阿難白佛言:「世尊!甚為希有,是諸菩薩摩訶薩,決定善說菩提之法。世尊!為是自三昧力,為是佛威神力,為是此經三昧力,能作是說耶?」

佛告阿難:「是諸善男子,曾於六十億那由他諸佛所,聞說是經無 有增減,如我今者說微密語,等無有異。彼不以三昧力故能作是 說。所以者何?彼於此經現見通達故。」

爾時阿難白佛言:「世尊!若有聞此經能信能解不生疑惑者。世尊!是善男子、善女人得幾所福?」

佛告阿難:「若善男子、善女人,欲求阿耨多羅三藐三菩提,以滿閻浮提七寶施諸如來,若有善男子、善女人,得聞是經信解不疑,阿難當知!其所得福甚多甚多。阿難!置閻浮提,假使以恒河沙世界滿中七寶施諸如來,若有得聞此經信解不疑,其福勝彼。」爾時世尊,欲重宣此義,而說偈言:

「若以閻浮提, 滿中七寶施;

奉諸佛如來, 慈悲導世者。

亦如恒河沙, 數等諸世界;

滿中諸珍寶, 以奉上諸佛。

若有聞此經, 能信能解者;

亦不生疑惑, 其福勝於彼。」

爾時阿難白佛言:「世尊!若有善男子、善女人,得聞是經能信能解,能信解已,復能受持讀誦通利,是善男子,善女人得幾所福?」

佛告阿難:「若善男子、善女人,求阿耨多羅三藐三菩提,遠離是經,於百劫中,行檀波羅蜜奉施諸佛,如是於百劫中,護戒、忍辱、精進、禪定,起五神通修行智慧,以遠離此經故,不如善男、善女,得聞是經信解不疑,受持讀誦悉令通利,其福勝彼。」爾時世尊,欲重宣此義,而說偈言:

「若滿百劫中, 以種種餚饍;

以供導世師, 未名供養佛。

若能持此經, 是名供養佛;

諸佛敬法故, 是無上恭敬。

若滿百劫中, 以種種衣散; 未名供養佛。 救世大精進, 若能持此經, 是最勝供養; 是名供養佛, 勝前以衣施。 若滿百劫中, 以種種華散; 救世大精雄, 未名供養佛。 供養諸佛者; 欲以最勝供, 應當持此經, 不染著諸果。 此供是大供, 諸供中最上; 若能持此經, 而不計於我。 若滿百劫中, 堅固守淨戒; 彼皆無名稱。 若不持此經, 若能持此經, 此戒有名稱; 於諸戒中上, 勝先行戒施。 雖有純淨戒, 無量難思議; 應當常勤求, 受持如是經。 如此經中說, 善修戒行者; 不名為惡戒, 亦不名破戒。 若持此經戒, 名持菩提戒; 持菩提定戒, 具足無作戒。 如是等諸戒, 皆於此經說; 若能持此經, 具足一切戒。 若人滿百劫, 能行大忍辱; 眾生惡口罵, 其心皆能忍。 若截其手足, 其身不擾動; 未曾起惡心, 瞋恨於他人。 如忍辱仙人; 行如是忍辱, 雖經百劫中, 其忍不為上。 若有聞此經, 信解能堪忍; 是忍名為上, 是忍名賢善。 是忍無有上; 是忍名最勝, 若能持此經, 而無所染著。 諸佛無上智; 欲求無染著, 不應牛染著, 速受持此經。 若滿百劫中, 常立不坐臥; 勤行大精進。 除却諸睡眠, 智者勤精進, 流布如是經; 是人到無畏, 勝彼大精進。

若滿百劫中, 能起万神诵; 不得聞此經, 其智不為上。 若能持是經, 诵達無依義; 於諸神通中, 是神通最上。 若滿百劫中, 修行諸智慧; 此慧是世間, 分別世間法。 若不學此經, 不名為明慧; 若能學是經, 是名堅固慧。 若有聞此經, 信樂無有上; 是人名為慧, 亦名诵達者。 欲以如是慧, 能知諸法如; 應官說此經, 當得如是慧。 慧者所行法, 皆此經中說; 應當勤精進, 受持於此經。」

爾時阿難,即於佛前,而說偈言:

「應往一由旬, 乃至百由旬; 聽受如是經, 能捨離諸果。 設有大火坑, 縱廣一由旬; 聽受如是經。 智者從中往, 於諸戒中上; 欲得諸聖戒, 應流布是經, 能淨於戒身。 欲得諸聖禪, 於諸禪中上; 應流布是經, 燒一切煩惱。 欲得諸聖慧, 於諸慧中上; 應流布是經, 能淨諸法界。 欲往詣諸方, 嚴淨諸世界; 其界名喜樂, 應流布是經。 欲見阿閦佛, 諸牟尼中尊; 應當持是經, 廣為眾生說。 種種之所行; 若欲淨菩薩, 應流布是經, 得往安樂界。 光明不可議; 得見彌陀佛, 應流布是經, 諸佛之所說。」

爾時世尊告阿難言:「善哉,善哉!如汝所言。所以者何?若善男子、善女人,以不散心讀誦此經為他解說,欲見諸佛即皆得見,若

以散亂心讀誦此經為他解說,其人命欲終時,眼見百千諸佛。所以者何?一切諸佛皆守護是善男子、善女人故。」

爾時會中有一童女,名曰師子,與五百童女俱即從坐起,偏袒右肩右膝著地,一心合掌白佛言:「若有女人,受持此經讀誦通利有何功德?」

爾時世尊告師子言:「若有女人,欲求阿耨多羅三藐三菩提,受持是經讀誦通利,當知是身最是後邊。所以者何?若有女人,以不散亂心受持是經讀誦通利,所有煩惱受女人身者不現在前。」

師子白佛言:「世尊!何等煩惱能受女身?」

佛告師子:「凡諸女人見他女人形容端正,以金、銀、珍寶種種珠 璣,嚴飾其身受眾快樂,見已生愛著心,不能如實觀察此身,但是 糞聚臭穢不淨,假以綵色眾香塗熏,惑愚者眼便生染著,起諸煩惱 故受女身。復次,師子!女人之性多諸慳嫉,言說時異,心思時 異,現前語異,屛處語異,為氣味故,有諸女人不為正法,瞋恚所 弊睡眠所蓋樂喜談說,以是緣故不能受持此經。又於晝夜多染污心 少出要心,成就如是諸惱心故,恒受女身不能令止。是故師子!若 女人欲不起煩惱不受女身者,應當受持讀誦此經為他解說。所以者 何?此經能除女人諸煩惱故。」

師子復白佛言:「世尊!若有女人,不為離女身受持此經讀誦通利者,當受女身不?」

佛告師子:「若有女人,雖不為離女身,受持此經讀誦通利,當知此身最是後邊,除其神足現女身者。師子!譬如有人投大火聚,而作是言:『莫燒我身燒我膚色。』於意云何?是人所語得稱意不?」

師子白佛言:「不也。世尊。所以者何?火性壞人形色。」 佛告師子:「此經亦爾,燒諸煩惱令無有餘。是故師子!若有女 人,欲不受女身,欲速得一切佛法,欲得見無量無邊諸佛,欲得無 礙辯才,欲以慈心遍緣一切眾生者,應受持此經讀誦通利為他解 說。」

爾時師子及五百童女白佛言:「世尊!我等於燃燈佛所受持是經!如是展轉至于今日。」

爾時阿難白佛言:「世尊!是師子童女,未盡女身分耶?」

佛告阿難:「於意云何,汝謂師子是女人耶?」

阿難白佛言:「如是,世尊!」

佛告阿難:「莫作是言。所以者何?是師子及五百童女,以神通力 現為女身,憐愍饒益未來世中諸女人故。所以者何?一切男子不得 隨意入諸家中。是故阿難!師子童女,以神通力現受女身,而此女 人,無女人法,無男子法,無非男非女法。所以者何?女人法、男 子法、非男非女法不可得故。阿難!是師子於此法中不得一切法, 成就法忍逮大照明。是故阿難!一切女人應當隨學,如師子童女受 持是經讀誦通利為他解說。」

爾時會中有五千比丘尼,即從坐起偏袒右肩右膝著地,一心合掌白佛言:「世尊!我從今日受持是經讀誦通利為他解說。所以者何?我不願樂更受女身。受持是經,若不究竟讀誦通利,終不坐臥亦不睡眠。」

佛告諸比丘尼:「善哉,善哉!作如是言。發大莊嚴而自莊嚴,以 大精進而自精進。所以者何?汝等不樂女身樂求佛法,是故汝等倍 加精進,堅心受持讀誦是經,悉令通利為他解說,當知汝等所受女 身最是後邊。」

爾時諸比丘尼,聞佛所說歡喜踊躍,各各脫身所著欝多羅僧,以散佛上,而說偈言:

「佛無有二語, 必成男子身; 說我等作佛, 我志願滿足。」

爾時會中有五千居士婦,從諸比丘尼聞是偈已,即從坐起偏袒右肩右膝著地,一心合掌白佛言:「世尊!我等今者受持是經,讀誦通利為他解說。所以者何?我等今者欲得遠離不自在身,視人顏色猶如婢妾,女人之身雖生王家長養,令大娉與他王不得自在,盡其形壽奉事其夫,懷妊十月受種種苦,以是事故,我等從今勤加精進,受持是經為他解說。受一食法奉持齋戒,脇不觸地,乃至奪命,誓不與夫携手親近,要當受持讀誦是經。」

爾時世尊告諸居士婦言:「善哉,善哉!諸善女人,快說此言。汝等從今更不屬他,常得自在,不視他顏色,無懷妊苦,不更處胎,生無婬欲無女人處諸佛世界。」

爾時阿難白佛言:「世尊!此諸姊等所生之處,世界何名佛號何等?」

佛告阿難:「世界名眾寶華光,佛號放眾寶摩尼王光如來等正覺, 今現在說法,此諸女人當生彼國。諸居士婦,受持是經故得見彼 佛。」

爾時諸居士婦,聞說是已,皆生歡喜,踊躍無量,即解頸十千真珠瓔珞,持用散佛,即於佛前,而說偈言:

「我等獲善利, 得遠離女身; 佛無有二語, 所說皆真實。 永棄如是身, 卑陋女人相; 但誑無智人, 不能如實知。 更不如婢妾, 屬他不自在; 亦不復十月, 懷妊受眾苦。 終不復更受, 處胎諸惡法; 已得離胎智, 此智無有上。」

爾時諸居士婦說此偈已,頭面禮佛右遶三匝,去佛不遠皆共就坐, 一心觀佛目不暫瞬。

爾時釋提桓因,以天拘藪摩花而散佛上,作如是言:「世尊!我當受持是經讀誦通利為他解說。」

佛告釋提桓因:「憍尸迦!汝若如是,終不更與阿修羅戰。」 爾時文殊師利法王子,欲令百千眾生所有善根轉明淨故,白佛言: 「世尊!如來昔者從我聞說是經發菩提心。」

佛告文殊師利:「以是事故,汝於百千萬億那由他菩薩眾中,最為明照,於十方世界開悟眾生,如日光明。」即時大地震動,天雨眾華,遶佛世尊積至于膝。

爾時阿難白佛言:「世尊!以何因緣大地震動,散眾天華積至于膝。」

佛告阿難:「今百千萬億那由他諸天,從文殊師利聞說此言,歡喜 踊躍散眾天華,皆發是言:『我等當受持讀誦是經為他解說,如文 殊師利法王子快說是言,我等亦當隨學;如文殊師利照明世間,我 等亦當如是照明。』說此語時,皆得憶念是經如現在前,是故心生 歡喜踊躍無量,復聞我從文殊師利得聞此經。阿難!是故大地震動 天雨眾華。」

爾時阿難白佛言:「世尊!此經成就諸大功德,此經成就未曾有功德,非是成就少善根眾生得聞此經。」

佛告阿難:「如是,如是!如汝所言。若善男子、善女人,供養無量百千諸佛乃聞是經,聞已信解受持讀誦為他解說。阿難!此善男子,在天人中當知如塔,若有受持讀誦是經者,其人所住方面便有明正法人。復次,阿難!若有受持是經讀誦通利為他解說,乃至書寫經卷而供養者,當知是人離諸惡趣,已能降伏惡魔波旬,建立法幢能行法施,燃大法炬破無明闇,吹大法鳌趣向道場,擊大法鼓開甘露門降大法雨,充足一切樂求法者。開諸法藏諸佛所聚出大法財,知一切法遠離諸想,所謂色、受、想、行、識想,眼、耳、財、知一切法遠離諸想,所謂色、受、想、行、識想,眼、耳、財、五、身、意想,色、聲、香、味、觸、法想,遠離一切諸法想,乃至佛、法、僧想。阿難!若有從我聞此經者,受持讀誦,當知是人便是我子,從佛口生從法身生。是故阿難!若有眾生,欲食

如來食,欲坐道場欲說正法,如我今者,應受持是經讀誦通利為他解說,乃至書寫經卷受持供養。」

爾時阿難白佛言:「世尊!未來世中受持是經讀誦通利為他解說,乃至書寫經卷而供養者,皆是今日受持讀誦是經者耶?」

佛告阿難:「如是,如是!所以者何?我未曾見諸餘世間,天人、魔梵、沙門、婆羅門、人及非人,於未來世能說是經,令他聞者無有是處。阿難!能於今日積聚法財,於未來世隨意受用。譬如居士若居士子,其家大富多饒財寶,金、銀、琉璃、真珠、摩尼,珂貝、璧玉倉庫盈溢,奴婢、僮僕、象、馬、牛、羊如是眾多,往至餘方遊戲觀看,其人後時還至財所得受用不?」

阿難白佛言:「世尊!自在受用,是其財故。」

「如是阿難!若於我前得聞此經,於未來世亦復得聞,受持讀誦如是經典,而設供養猶如今日。阿難!我以佛眼見有信解受持是經讀誦通利為他解說,乃至書寫經卷如今,阿難!而供養者,亦見誹謗不信受者。」

爾時阿難白佛言:「世尊!若有眾生不信解是經而誹謗者,其人罪報當生何處?」

佛告阿難:「且止!不須問也。」

阿難白佛言:「世尊!惟願說之,為不信此法眾生生信樂故。」 佛告阿難:「其人罪報生處,與五無間業等。阿難!於意云何?假 使有人於一日中,悉斷三千大千世界眾生命根,其人生處罪報云 何?」

阿難白佛言:「甚惡。世尊!」

佛告阿難:「其人罪報亦與彼等。阿難!於意云何?假使有人,若壞若燒恒河沙諸佛般泥洹後所起塔廟,得罪多不?」

阿難白佛言:「甚多。世尊!眼不應視,耳不應聞。」

佛告阿難:「其人生處罪報云何?」

阿難白佛言:「世尊!甚惡甚重。」

佛告阿難:「其人罪報亦與彼等。阿難!於意云何?假使有人,壞

亂過去、未來、現在諸佛正法。其罪云何?」

阿難白佛言:「甚重。世尊!」

佛告阿難:「其人罪報亦與彼等。」

阿難白佛言:「世尊!若有毀呰誹謗令眾生遠離是經。其罪云何?」

佛告阿難:「於意云何?三千大千世界眾生,皆行十善求阿耨多羅三藐三菩提,假使有人毀壞其眼。其罪多不?」

阿難白佛言:「甚多。世尊!當於百千萬億那由他劫,在地獄中受 諸苦惱。」 佛告阿難:「我今語汝,若有眾生毀謗此經,乃至一人令遠離者, 當知此罪亦與彼等。」

阿難白佛言:「世尊!若有菩薩,欲求阿耨多羅三藐三菩提,於此經中雖有疑心而不誹謗。其罪云何?」

佛告阿難:「若生疑心則逆諸佛而有罪過,經一億劫遠離菩提。」 阿難白佛言:「世尊!若有眾生誹謗是經,令多眾生而遠離者,所 受罪身大小云何?」

佛告阿難:「且止!不須問此罪身大小。」

阿難白佛言:「世尊!惟願說之,令此四眾來世眾生慚愧怖畏。」

佛告阿難:「其人罪身長一萬由旬,受無量苦。」

阿難白佛言:「其人不能護口,所受舌報大小云何?」

佛告阿難:「其罪人舌,縱廣一千由旬,五百鐵犁光焰熾燃以耕其舌。復有五百鐵丸,光焰熾燃雨其舌上,以其前世不護口故。」爾時四眾皆生怖懼身毛皆竪,涕泣流淚舉身投地,皆共同聲作如是言:「世尊!我等今者為彼族姓子、族姓女發露懺悔,願令遠離如是罪身不受眾苦。」會中復有涕泣流淚作如是言:「世尊!我等若於此生,若前百千萬億那由他生,曾起疑心作是眾苦因緣者,我等今於如來等正覺前,及餘百千萬億不可限量諸佛世尊前,發露懺悔。諸佛如來願以佛眼見知我等,我等今者所有罪業,皆悉發露不敢覆藏,我等愚小,無知無覺無有方便,惟願諸佛,以憐愍故受我等悔。」

佛告諸善男子:「善哉,善哉!汝等今於我前不覆藏罪發露懺悔, 於我法中便為增益。」

阿難白佛言:「世尊!今此會中生疑心者,皆受如是地獄苦耶?」佛告阿難:「今此會中生疑心者,以悔過故其罪甚少。」

阿難白佛言:「彼人受罪為多少耶?」

佛告阿難:「其人欲命終時,身上一一諸毛孔中受無量苦亦不經 久。所以者何?以於我前及餘無量無邊諸佛世尊悔過罪故。阿難! 是故諸族姓子、族姓女,不欲受如是罪身,如是罪舌,如是眾苦 者,應當信解是經莫生疑惑。阿難!若有善男子、善女人,不欲捨 佛、捨法、捨比丘僧,不欲捨過去、當來、現在諸佛正法者,應受 持是經讀誦通利為他解說,書寫經卷而供養之。」

阿難白佛言:「世尊!如來今者說《不退轉輪經》,以何緣故作如 是說『若不捨僧』?不捨何僧?」

佛告阿難:「僧者所謂不退轉者說名為僧,為不退轉法來集會者亦 名為僧。」

阿難白佛言:「退轉菩薩不在僧數中耶?」

佛告阿難:「若有深發菩提心不見此心者,皆入不退轉僧中。」

阿難白佛言:「希有世尊,諸佛成就大方便力,以方便故說如是法。」

爾時釋提桓因,以天曼陀羅華而散佛上,白佛言:「世尊!願令一切眾生皆成就如是方便。」

佛告釋提桓因:「憍尸迦!若有信解是經者,皆當成就如是方便演 說諸法,如我今者等無有異。」

爾時有百千諸天,以天曼陀羅花而散佛上,作是言:「願令一切眾生逮得是經。」

爾時阿難白佛言:「世尊!惟願如來,憐愍未來眾生守護是經。」爾時佛告阿難:「若善男子、善女人,在大海中應聞是經,是善男子、善女人皆悉得聞。所以者何?先佛如來已守護故。」

阿難白佛言:「世尊!先佛如來雖守護是經,如來今者憐愍眾生當 守護是經。」

爾時大地六變震動,即於佛前有閻浮那提金色天華自然而現,其華有百千萬億葉,出大光明遍照十方恒河沙諸佛世界。是時四眾皆見十方恒河沙世界諸佛世尊,是諸佛前,亦有閻浮那提金色天華,有百千萬億葉自然而現,出大光明遍照十方。爾時釋提桓因,即自化身作居士形,持種種花與諸四眾作如是言:「諸仁!今者可以此花散如來上,亦用供養是經法故。」是時四眾即取其花散如來上。佛神力故所散之花,於諸佛上變成花蓋。

是時四眾白佛言:「世尊!以何緣故大地震動?是大蓮花於諸佛前自然而現,乃至東方恒河沙諸佛世界,南、西、北方、四維、上、下恒河沙諸佛世界亦復如是。」

佛告四眾:「若先有此相,當知諸佛已守護是經。」

爾時阿難白佛言:「世尊!如來今者已守護是經耶?」

佛告阿難:「如是,如是!我已守護。」

阿難白佛言:「唯佛世尊守護是經,餘世界佛亦守護是經耶?」

佛告阿難:「十方恒河沙諸佛世尊亦守護是經。」

阿難白佛言:「世尊!當何名是經?云何受持?」

佛告阿難:「此經名『不著諸果』,亦名『遠離諸果』,亦名『說堅信、堅法、八人、須陀洹、斯陀含、阿那含、阿羅漢、聲聞、辟支佛密義』,亦名『降伏遣魔』,亦名『與六波羅蜜相應』。所以者何?若善男子、善女人,信解是經受持讀誦,乃至書寫經卷而供養者,便具足修行六波羅蜜。」

阿難白佛言:「世尊!云何信解是經受持讀誦,具足修行六波羅蜜耶?」

佛告阿難:「若善男子、善女人,信解是經名檀波羅蜜,不生疑惑名尸波羅蜜,堪任此法名羼提波羅蜜,心無怯弱名精進波羅蜜,心

不擾動名禪波羅蜜,不分別一切法名般若波羅蜜。是故阿難!此經名『六波羅蜜相應』,亦名『一切諸佛正說』,亦名『廣大不退轉輪』,亦名『廣博嚴淨不退轉輪』。阿難!如是等名汝當受持。」阿難白佛言:「世尊!聞此經名,尚應聽受,何況具聞初、中、後說。」

佛告阿難:「如是,如是!如汝所言。」

阿難白佛言:「世尊!若有得聞此經名者,能却幾劫生死罪耶?」 佛告阿難:「若有得聞《廣博嚴淨不退轉輪經》名者,聞已信解。 阿難當知!是諸眾生,得却百千劫生死。」

阿難白佛言:「世尊!若有眾生,得聞是經,能信解已發菩提心者,逮得何法?」

佛告阿難:「如是眾生已逮受記,當得阿耨多羅三藐三菩提。」 爾時四眾,各各自見其所坐前有大蓮華自然而現,其華開敷有百千葉,亦有百千萬億光色。是時四眾心生歡喜踊躍無量,即取是華以 散佛上,作如是言:「願使我等於未來世宣說是經,猶如世尊等無 有異。」

爾時世尊即便微笑。當爾之時,一切音樂不鼓自鳴,一切眾香自然 芬熏,百千萬億虛空諸天,於虛空中作大音樂,復有百千萬億諸 天,於虚空中雨天細末栴檀種種天香,天阿迦樓香,細末多摩羅 香,復雨天閻浮那提金粟銀粟天摩尼寶,復雨曼陀羅華,摩訶曼陀 羅華,波樓沙華,摩訶波樓沙華,曼殊沙華,摩訶曼殊沙華,迦迦 羅華,摩訶迦迦羅華,樓遮摩那華,摩訶樓遮摩那華,輸婆摩那 華,摩訶輸婆摩那華,天優鉢羅華,拘物頭華,芬陀利華,如是眾 華,而散佛上。種種天香,種種天鬘,乃至諸天所有珍寶皆悉雨 之,虚空諸天現身在地,而作音樂以供養佛,世間諸人各各脫身所 著上服而散佛上。復有諸人,脫手足瓔珞咽胸瓔珞所著天冠華鬘而 散佛上。復有諸人,以金銀天冠,眾寶天冠,眾華天冠,栴檀天冠 散佛上者。復有諸人歡喜踊躍稱慶無量。當爾之時,牛馬歡悅出和 柔聲,虚空眾鳥出和雅音,地獄畜生離苦獲安,餓鬼充足離飢渴 苦,天、龍、夜叉、乾闥婆、阿修羅、迦樓羅、緊那羅、摩睺羅 伽、人非人等,皆悉歡喜踊躍無量。是時眾生皆得慈心,慈心相向 無有忿恨。

爾時阿難白佛言:「世尊!以何因緣世尊微笑?諸佛如來不以無緣而笑。」

爾時世尊告阿難言:「今此四眾比丘、比丘尼、優婆塞、優婆夷,天、龍、夜叉、乾闥婆、阿修羅、迦樓羅、緊那羅、摩睺羅伽、人非人等,今於我前得聞此經,及未來世得聞經者,皆於阿耨多羅三

藐三菩提而不退轉,後成佛時宣說是經無有增減,如我今日等無有 異。」

佛說是經時,有無量無邊不可思議不可限量百千萬億那由他天、龍、夜叉、乾闥婆、阿修羅、迦樓羅、緊那羅、摩睺羅伽、人非人等,皆於阿耨多羅三藐三菩提而不退轉。佛說是經已,文殊師利法王子,無邊無量諸菩薩摩訶薩,尊者阿難諸大聲聞,及諸四眾比丘、比丘尼、優婆塞、優婆夷。天、龍、夜叉、乾闥婆、阿修羅、迦樓羅、緊那羅、摩睺羅伽、人非人等,及諸世間聞佛所說,皆大歡喜。

廣博嚴淨經卷第六

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".